

四庫全書

子部

欽定四庫全書

子部

古儷府卷五

詳校官中書_臣金應琦

主事_臣祁韻士履勘

總校官中書_臣朱 鈐

校對官中書_臣王家賓

謄錄監生_臣朱連傑

欽定四庫全書

古儷府卷五

明 王志慶 編

人部 君臣

唐潘炎君臣相遇樂賦 繼天者君也戴天者臣也下之事上作股肱耳目上之任下敷心腹腎腸

宋王安石除平章事監修國史謝表 臣聞人君代天而理物人臣資父以事君然則君臣之大義有方非若

父子之至恩無間須倡而後和則誠意每患於難通不入而後量則忠力或嫌於自獻惟成湯之聽伊尹與傅說之遇高宗皆以䟽遠而相求何其親厚之獨至蓋所趨非由於二道故所為若出於一身夫豈於越夷貉之異心是謂元首股肱之同體二臣既以此獲展事君之義兩君亦以此得成理物之功苟非其人孰與於此齊王融求自試啟 春庚秋蟀集候相悲露水風榮臨年共悅夫惟動植且或有心況在生靈而能無感 夫

君道含弘臣術無隱翁歸乃居中自見克國曰莫若老
臣竊景前修敢蹈輕節

唐盧照隣歌公卿 歌雲佐漢捧日匡堯

獨孤及送餘杭薛郡守入朝序 受宣室之釐忽思賈
誼以謗書之篋先示樂羊

李嶠攀龍臺碑 賈文和之揣君酈食其之觀將翔而
後集可謂明遠

人部 父子

唐杜甫送許八拾遺歸江寧覲省詩

詔許辭中禁慈

顏赴北堂聖朝新孝理祖席倍恩光
內帛擎偏重宮衣著更香
淮陰清夜驛京口渡江航
春隅雞人畫秋期燕子涼
賜書誇父老壽酒樂城隍
看畫曹飢渴追蹤恨
蘇茫虎頭金粟影神妙獨難忘

劉長卿送張七判官還京覲省詩

春蘭方可採此去

葉初齊
函谷鶯聲裏泰山馬首西
庭開新栢署門館舊桃蹊
春日長安道相隨入禁闈

錢起送邊補闕東歸覲省詩 東去有餘意風生賜錦
衣鳳凰銜詔下才子採蘭歸斗酒百花裏人情一笑稀
別離須計日想望在彤闈

盧綸送尹樞令狐楚及第後歸覲詩 佳人比香草君
子即芳蘭寶器金疊重清音玉佩寒貢文齊受寵獻醴
兩承歡鞍馬并汾地爭迎陸與潘

盧綸送渾鍊歸覲却赴闕庭詩 雲幕擁簪裾台庭餞
伯魚綵衣人競看銀詔帝親書知子當元老為臣餞二

疏執珪期已迫捧膳步寧徐而我誠愚者夫君豈病諸
探題多決勝饌玉每分餘榮比成功後恩同造化初甑
塵方欲合籠翩忽將舒榆筴錢難比楊花雪不如明朝
古隄路心斷玉人車

盧綸送內弟韋仁宗歸信州覲省詩 常嗟外族弟兄
稀轉覺心孤是送歸醉掩壺觴人有淚愁穿魂夢月無
輝烹魚綠岸烟浮草採橘青溪露濕衣聞說江樓長卷
慢幾回風起望胡威

權德輿送崔端公郎君入京覲省詩 已見風姿美仍聞

藝業勤清秋上國路白晳少年人帶月輕帆疾迎霜綵
服新過庭若有問一為說漳濱

戎昱送王端公之太原歸覲相公詩 杜史今何適西
行詠陟岡也知人惜別終美鴈成行春雨桃花靜離樽
竹葉香到時丞相閣應喜棣華芳

周庾信傷心賦 或有擁樹罹災藏衣遭難未設桑弧
先空柘館人惟一丘亭遂千秋邊韶永恨孫楚長愁張

壯武之心疾羊南城之淚流
膝下龍堆掌中珠碎芝
在室而先枯蘭生庭而早刈
對寶盃而痛心撫玄經
而流慟石華空服犀角虛簫風無少女草不宜男烏毛
徒覆獸乳空含

周宇文道庾信集序
青鸞降宿樹之祥白雉有依欄
之感

唐李華二孝讚序
靈武二孝曰侯知道程俱羅生養
以孝沒奉以哀廬於塚次號泣無節埃垢積首草生髮

間每大漠晨空連山夜寂人烟四絕虎豹與隣擁墳推
膺聲氣咽塞下入九泉上徹九天背爛心朽皮枯節攀
草木先秋而凋落景氣不時而凝烟一作開殊鳥異獸助
之悲號萬物有極此哀無窮色慘義蒿聲酸棘薪

晉書孝友傳論 大矣哉孝之為德也分渾元而立體

道貫三靈資品彙以順名功苞萬象用之于國動天地
而降休徵行之于家感鬼神而昭景福若乃博施備物
尊仁安義柔色承顏怡怡盡樂擊鮮就養疊疊忘劬集

苞思藝黍之勤循陔有採蘭之詠事親之道也屬屬如
在哀哀罔極聚薪流慟銜索興嗟灑風樹以隤心頽寒
泉而沫泣追遠之情也審德筮仕正務移官居高匪危
在醜無爭協修升以匡化懷履冰而砥節立身之行也
是以閑曾翼翼遵六教而緝貞規慕董烝烝弘七體而
垂令迹亦有至誠上感明祇下贊郭巨致錫金之慶陽
雍標蒔玉之祉烏馴丹羽巢叔和之室鹿呈白毳擾功
文之廬

唐王維右豹韜衛長史任君神道碑 廬以長號淚少
於血杖而後起骨餘於形彈琴不成從先王之禮捧筐
便慟有終身之哀

段文昌平淮西碑 樂書作帥鉞為戎右克國討虜印
統支軍是能從帥之命成父之志 昔趙孟慕成季之
勲復能霸晉亞夫紹絳侯之武亦克擒吳

周庾信大將軍趙公墓銘 泉驚孝水竹動寒林

又柱國大將軍紇干弘神道碑 對其苦寢則梓樹寒

生聞其悲泣則巢禽夜下

又大將軍聞喜公柳遐墓誌 成都孝子自赴江流桂
陽先賢身彰野火並存靈應咸可傷嗟

人部

夫婦間
情附

漢蔡邕協初賦 其在近也若神龍采鱗翼將舉其既
遠也若披雲緣漢見織女立若碧山屹其豎動若翡翠
奮其羽衆色遼照視之無主面若明月輝似朝日色若
蓮葩肌如凝蜜

宋謝靈運江妃賦

小腰微骨朱衣皓齒睇視騰來靡

容膩理出月隱山落日映嶼收霞斂色迴飈拂渚每馳
情於晨暮矧良遇之莫叙投明珠以申贈覲色授而魂
與嗟佳人之眇邁眺霄際而皓語懼展愛之未期抑傾
念而暫佇天台二娥宮亭雙媛青桂神接紫衣形見或
飄翰凌煙或潛泳浮海萬里俄頃寸陰未改事雖假于
雲物心常得於無待

梁江淹麗色賦

夫絕世獨立者信東鄰之佳人既翠

眉而瑤質亦盼瞳而頰脣鏤金花及珠履蜨綺袂與錦
紳色練練而欲奪光炎炎而若神非氣象之可譬焉影
響而能陳故仙藻靈葩冰華玉儀其始見也若紅蓮鏡
池其少進也如綵雲出崖五光徘徊十色陸離寶過珊
瑚同樹價直瓊草共枝于是雕臺繡戶當衢橫街椒庭
承月碧幌延日架虬柱之嚴麗亘虹梁之峻密錦幔垂
而香寂桂煙起而清謐女乃曜邯鄲之躡步媚北里之
鳴瑟若夫紅華舒春黃鳥飛時紺蕙初軟頰蘭始滋不

擊衡帶無倚桂旗摘芳拾蕊涵詠吐辭笑月出于陳歌
感蔓草于衛詩氣炎日永離明火中槿榮任露蓮花勝
風後攔丹柰前軒碧桐笙歌晚右琴舞池東至乃西陸
始秋白道月弦金波照戶玉露暖天氣以濕兮曉未半
星水流兮夜何央憶雜佩兮且一歎念錦衾兮以九傷
於是帳必藍田之寶席必蒲萄之文館圖明月室畫浮
雲言必入媚動必應規有光有豔如合如離氣柔色靡
神凝骨竒經秦歷趙既無其雙尋楚訪蔡不覲其容非

天下之至麗孰能與於此哉

沈約麗人賦 有客弱冠未仕締交戚里馳騫王室遨

遊許史歸而稱曰狹斜才女銅街麗人亭亭似月嫵婉

如春凝情待價思尚衣巾芳躅散靡色茂開蓮陸離羽

佩雜錯花鈿嚮羅幃而不進隱明燈而未前步中檐而

一息順長廊而迴歸池翻荷而納影風動竹而吹衣薄

暮延佇宵分乃至出闌入光含羞隱媚垂羅曳錦鳴瑤

動翠來脫薄粧去留餘膩霑膚委露理鬢清渠落花入

領微風動裾

唐駱賓王蕩子從軍賦

全錄

胡兵十萬起妖氛漢騎

三千掃代

一作陣

雲隱隱地中鳴戰鼓迢迢天上下

一作出

將軍邊沙遠雜風塵氣塞草長垂霜露天蕩子苦辛十

年行回首關山萬里情遠天橫劍氣邊地聚笳聲鐵騎

朝恒警銅焦夜不鳴抗左賢而列陣屯右校以䟽營滄

波積凍連蒲海白雪凝寒逼柳城若乃地分玄微路指

青波邊城暖氣由來少關塞寒雲本自多嚴風凜凜將

軍樹苦霧蒼蒼太史河既拔距而從軍亦揚麾而挑戰
征旆隣沙漠戎衣犯霜霰樓船一舉爭沸騰烽火四連
相隱見戈文耿耿懸落星馬足駸駸擁飛電終取雋而
先鳴豈論功而後殿征夫行樂踐榆溪倡婦銜怨守空
閨蘼蕪舊曲終難贈芍藥新詩豈易題池前怯對鴛鴦
伴庭際羞看桃李蹊花有情而獨笑鳥無事而恒啼見
空陌之草積知閨牖之塵栖蕩子別來年月久賤妾空
閨更難守鳳凰樓上罷吹簫鸚鵡杯中寧勸酒聞道書

來一鴈飛此時絨怨下鳴機裁鴛帖夜被薰麝染春衣
屏風宛轉蓮花帳窗月玲瓏翡翠帷箇日新粧始復罷
祇應含笑待君歸

呂向美人賦

燕趙鄭衛楚越巴漢之邦士農工商皂

隸與臺之族不鄙褊陋不隔賤卑工技者密聞淑邈者
遽知上心由是震動中使載以交馳周若雲布迅如飈
發以日繫時以時繫月德雋相次為樂不歇開紫微環
帝座萼華灼爍柳容婀娜輕羅隨風長縠舒蒙霧隔膚

紅柔姿靡質妖艷逞逸絕衆挺出孌然容冶霍若明媚
曼睩騰光以橫波修蛾濯色以揔翠齒編貝鬢含雲顏
綽約以冰雪氣芬郁而蘭薰腰珮激而成響首飾曜而
騰文或纖麗婉以似羸或穠盛態而多肌有沈靜見節
有語笑呈姿思若老成體類嬰兒 妙舞謂何尚以輕
善歌取何矜以清齊列捷獵按次屏管間直往以曳緒
歛轉入而旋紫低視候節紆體遺聲過行雲結遺風衆
工相錯迭美不同

徐寅勾踐進西施賦 波淺丹臉鴉深綠鬟 楊柳羞
弱芙蓉遜妍 乃命寶馬騰龍香車輾風迎織女于銀
漢聘姮娥于月宮炫燿雲外喧闐洞中粧成而瑞玉凝
彩服麗而朝霞剪紅昨日猶賤今晨不同

陳張正見怨歌行 新豐妖冶地遊俠競嬌奢池臺間
羅綺桃李雜烟霞蓋影分連騎衣香合並車艷粉驚飛
蝶紅粧映落花舞衫飄冶袖歌扇掩團紗玉帳珠簾捲
金樓鏡月斜還疑簫史鳳不及李倫家

唐宋之間江南行
妾住越城南
離居不自堪
採花驚曙鳥
摘葉餒春蠶
懶結茱萸帶
愁安玳瑁簪
待君銷瘦
盡日暮綠江潭

李叔卿江南行
湖上女江南
花無雙越女
春浣紗風似
箭月如弦
少年吳兒曉
進船
郗家子弟
謝家郎
烏巾白
袷紫香囊
菱歌思欲絕
楚舞斷人腸
歌舞未終涕
雙隕舊宮坡
陀繞嶙隱
西山暮雨過
江來北渚
春雲沿海
盡渡日水流
緩妾歸宵
剩遲含情為
君再理曲
月華照

出澄江時

為艇章江南行 春江可憐事最在美人家
鸚鵡能言鳥芙蓉巧笑花
馬銜金作埒水抱玉為砂
薄晚青絲騎長鞭赴狹斜

劉春虛江南行 美人何蕩漾湖上風月長
玉手欲有贈徘徊雙明璫
唱歌隨淥水怨色起青陽
日暮還家望烟雲橫洞房

陳標江南行 水光春色滿江天
蘋葉風吹荷葉錢香

蟻翠旗臨岸市艷娥紅袖渡江船曉驚白鷺聯翩雪浪
感青菱歟灩煙不怕汀洲芳草暮待將春興折湖蓮

梁張率長相思詩 長相思久別離所思何在若天垂鬱

陶相望不得知玉階月夕映羅帷風夜吹相思不能寢
坐望天河移

又陸瓊詩 長相思久離別一罷鴛鴦機聲絕鴻始去
柳堪結室冷鏡凝冰庭幽花似雪容貌春春減書字朝
朝減

又王璩詩 長相思久離別兩同心憶不相徹悲風淒
愁雲結柳葉眉上銷菱花鏡中滅鴈封歸飛斷鯉素還
流絕

唐權德輿詩 少小別潘郎嬌羞倚畫堂有時裁尺素
無事約殘黃鵲語臨粧鏡花飛落繡床相思不解說明
月照空房

梁王筠有所思詩 丹墀生細草紫殿網輕陰曖曖巫山
遠悠悠湘水深徒歌轆轤劍空貽璫璫簪望君終不見

屑淚且微吟

入庾肩吾詩

佳期杳不歸春物生芳菲拂匣看離扇

開箱見別衣井桐生未合宮槐卷復稀不及銜泥燕從
來相逐飛

又王僧孺詩

夜風吹熠燿朝光照辟邪幾銷靡蕪葉

空落蒲萄花不堪長纖素誰能獨浣沙光陰復何極望
促反成賒知君自蕩子奈妾亦倡家

梁簡文帝擢歌

妾住在湘川菱歌本自便風生解刺

浪水深能捉船葉亂由牽荇絲飄為折蓮濺粧疑薄汗
霑衣似故湔浣沙流暫濁汰錦色還鮮參伺趙飛燕借
問李延年從來入絃管詎在櫓歌前

隋盧思道詩 秋江見底清越女復傾城方舟共采摘最
得可憐名落花流寶珥微吹動香纓帶隨連理濕棹舉
木蘭輕避人傳細語因波送遠情誰能結錦纜薄暮隱
長汀

唐駱賓王詩 寫月塗黃罷凌波拾翠通鏡花搖芟日衣

麝入荷風葉密舟難蕩蓮疎浦易空鳳媒羞自託鴛翼
恨難窮愁帳燈光翠倡樓粉色紅相思無別曲併在擗
歌中

溫庭筠和友人悼亡詩 玉貌潘郎淚滿衣畫羅輕鬢
兩霏微紅蘭委露愁難盡白馬朝天望不歸寶鏡塵昏
鸞影在細箏絃斷鴈行稀春來多少傷心事碧草侵階
粉蝶飛

杜審言悼亡詩 二八泉扉掩帷屏寵愛空淚痕銷夜

燭愁思亂春風巧笑人疑在新粧曲未終尚憐脂粉氣
留著舞衣中

隋盧思道後園宴詩 嘗聞崑閬有神仙雲冠羽佩得長
年秋夕風動三珠樹春朝露濕九芝田不如鄴城佳麗所
玉樓銀閣與天連太液回波千丈映上林花樹百枝燃
流風續洛渚行雲在南楚可憐白水神可念青樓女便
妍不羞澁遙艷工言語池苑正芳菲得戲不知歸媚眼
臨歌扇嬌香出舞衣纖腰如欲斷側髻似能飛南樓日

已暮長簷鳥應度竹殿遙聞鳳管聲虹橋別有羊車路
攜手傍花叢徐步入房櫳欲眠衣先解半醉臉逾紅日
日相看轉難厭千嬌萬態不知窮欲知妾心無劇已明
月流光滿帳中

闕

七召

妍姿艷逸淑性閒華效施顰于宋里
經墮馬于梁家折纖腰以微步擅皓腕乎輕紗臨池正
領拂鏡看花觀堵墻以颯沓傾城國以諠譁墨欲歸而
抽軫惠將返而迴車至乃鄭衛繁聲抑揚絕調足使風

雲變動性靈感召擊哀嚮則春臺之人愴焉而雪涕起
歡情則崩城之婦孺然而微笑解谷調鳳之竹龍門獨
鵠之柯綠珠絳樹宋獵韓娥青春婉婉上客經過開洞
房以命賞召才人而合宴舉輕慢以徐來隔珠簾而可
見牀披珠象簾展羅薦聽促柱之方進聞廣聲之始轉
步想象以頓足腕踣蹙而拂面托斜視於遺簪寄含情
而舉扇俄而夕烏東逗落日西懸綺霞映水蛾月昇天
解鴛鴦之繡被拂距蛩之長釵燭中帷而動爛香出帳

而微烟願橫施以自昵脫斜領于君前

後漢張衡七辨 西施之徒姿容修嫵弱顏回植妍夸

閒暇形似削成腰如束素淑性窈窕秀色美艷鬢髮玄
髻光可以鑒靨輔巧笑清眸流盼皓齒殊唇的皪粲練
于是紅華曼理遺芳酷烈待夕先至同茲宴褻假明蘭
燈指圖觀列蟬綿宜愧天紹紆折

晉陸機七徵 若夫妖嬈艷女蒐羣擢俊穆藻儀于令
表茂當年之柔曼靨視趨之綽約體每變而增閒秀紅

蕤其愉愉若餘穎之可餐若夫靈晷潛祖顏退羽觴升
清琴厲因清明以宣誠流微睇而授愛纖手揮而鳴珮
鏗華衿被則芳塵萃

梁簡文帝七勵 于時斜光西委薄霧舒紅隨珠照影
羅衣從風觀者方堤觀者盈淇令二鷺之綴翼使八鶴
之增悲明君為之歛泣西施為之解眉

唐李商隱上河東公啟 某悼傷已來光陰未幾梧桐半
死才有迷哀靈光猶存且兼多病春言息肩不暇提攜

或小于叔夜之男或幼于伯喈之女檢庾信荀娘之啓
常有酸辛詠陶潛通子之詩每嗟漂泊所賴因依德宇
馳驟府庭方思効命旌旄不敢載懷鄉土錦茵象榻石
館金臺入則陪奉光塵出則揣摩鉛鈍兼之早歲志在
玄門及到此都更敦夙契自安衰薄微得端倪至于南
國妖姬叢臺妙妓雖有涉于篇什實不接于風流况張
懿仙本自無雙曾來獨立既從上將又託英條汲縣勒
銘方依崔瑗漢庭曳履猶憶鄭崇寧復河裏飛星雲間

墜月窺西家之宋玉恨東舍之王昌誠出恩私非所宜
稱伏惟克從至願賜寢前言使國人盡保展禽酒肆不
疑阮籍則恩眷之理何以加焉

陳伏知道為王寬與婦義安主書 昔魚嶺逢車芝田

息駕雖見妖嬈終成揮忽遂使家勝陽臺為歡非夢人
慙簫史相偶成仙輕扇初開欣看笑靨長眉始畫愁對
離粧猶聞徒佩顧長廊之未盡尚分行憶冀迥陌之難
迴廣攝金屏莫令愁擁恒開錦幔速望人歸鏡臺新去

應餘落彩薰爐未徙定有餘烟泪滴芳衾錦花長濕愁
隨玉軫琴鶴恒驚已覺錦水丹鱗素書稀遠玉山青鳥
仙使難通綵筆試操香牋遂滿行雲可托夢想還勞九
重千日詎想倡家單枕一宵便如蕩子當今照影雙來
一鸞羞鏡勿使窺窗獨坐嫦娥笑人

梁何遜為衡山侯與婦書 昔人邀遊洛汭會遇陽臺
神仙髣髴有如今別雖帳前微笑涉想猶存而握裏餘
香從風且歇掩屏為疾引領成勞鏡想分鸞琴悲別鶴

心如膏火獨夜自煎思等流波終朝不息始知萋萋萱
草忘憂之言不實團團輕扇合歡之用為虛路邇人遐
音塵寂絕一日三秋不足為喻聊陳往翰寧寫款懷遲
枉瓊瑤慰其杼軸

陳徐陵玉臺新詠序 凌雲際日由余之所未窺千門

萬戶張衡之所曾賦周王璧臺之上漢帝金屋之中玉
樹以珊瑚作枝珠簾以玳瑁為匣其中有麗人焉其人
也五陵豪族克選掖庭四姓良家馳名永巷亦有潁川

新市河間觀津本號嬌娥曾名巧笑楚王宮內無不推
其細腰魏國佳人俱言訝其纖手閱詩敦禮非直東隣之
自媒婉約風流無異西施之被教弟兄協律生小學歌
少長河陽由來能舞琵琶新曲無待石崇篴篥雜引非
因曹植傳鼓瑟于楊家得吹簫于秦女至若寵聞長樂
陳后知而不平畫出天仙閼氏覽而遙妬且如東隣巧
笑來侍寢于更衣西子微顰將橫陳於甲帳陪游馭娉
騁纖腰于結風長樂鴛鴦奏新聲于度曲粧鳴蟬之薄

鬢照墮馬之垂鬟反插金鈿橫抽寶樹南都石黛最發
雙蛾北地臙脂偏開兩靨亦有嶺上仙童分九魏帝腰
中寶鳳授厯軒轅金星與婺女爭華麝月共嫦娥競爽
驚鸞冶袖時飄韓掾之香飛燕長裾宜結陳王之佩雖
非圖畫入甘泉而不分言異神仙戲陽臺而無別真可
謂傾國傾城無對無雙者也加以天情開朗逸思雕華
妙解文章尤工詩賦琉璃硯匣終日隨身翡翠筆床無
時離手清文滿篋非惟芍藥之花新製連篇寧止蒲萄

之樹九日登高時有緣情之作萬年公主非無累德之
詞其佳麗也如彼其才情也如此既而椒房宛轉拓館
陰岑絳鶴宸嚴銅蠡晝靜三星未夕不事懷衾五日猶
賒誰能理曲優游少託寂寞多閒厭長樂之疎鐘勞中
宮之緩箭輕身無力怯南陽之搦衣生長深宮笑扶風
之織錦雖投壺玉女為歡盡于百駢爭博齊姬心賞窮
于六著無怡神于暇景惟屬意于新詩庶得代彼萱蘇
蠲茲愁疾但往世名篇當今巧製分諸麟閣散在鴻都

不藉篇章無由披覽于是燃脂暝寫弄墨晨書撰錄艷
歌凡為十卷曾無參于雅頌亦靡濫於風騷涇渭之間
若斯而已于是麗以金箱裝之寶軸三臺妙迹龍伸蠖
屈之書五色花牋河北膠東之紙高樓紅粉仍定魯魚
之文辟惡生香聊防羽陵之蠹靈飛六甲高擅玉函鴻
烈仙方長推丹枕至如青牛帳裏餘曲既終朱鳥窗前
新粧已竟方當開茲縹帙散此綃繩永對玩于書帷長
循環于纖手豈如鄧學春秋儒者之功難習竇傳黃老

金丹之術不成固勝西蜀豪家託情窮于魯殿東臺甲
館流詠止于洞簫變彼諸姬聊同棄日猗與彤管麗矣
香奩

梁劉孝儀為人作連珠 洛妃高髻不資于草澤玄妻
長髮無藉于金鈿故雲名由于自美蟬稱得于天然是
以梁妻獨其妖艷衛姬專其可憐 津亭掩馥祇結秦
婦之恨爵臺餘妬追生魏妾之悲

唐楊炯原州百泉縣令李君神道碑 霜淒月瑩菊艷

茗華淑問秀于閨房柔風洽于詩禮琴前鏡裏孤鸞別
鶴之哀竹死城崩杞婦霜娥之泣

人部 兄弟

唐岑參送李太保兼御史大夫充渭北節度使詩 詔

出未央宮登壇近總戎上公周太保副相漢司空弓抱
關西月旗翻渭北風弟兄皆許國天地荷成功

白居易同夢得暮春寄賀東西川二楊尚書詩 龍

節對持真可愛鴈行相接更堪誇兩川風景同三月千

里江山屬一家魯衛定知聯氣色潘楊亦覺有光華應
憐洛下分司伴冷宴閒遊老看花

章孝標贈劉侍郎子弟三人一時及第詩 文動星辰
衣彩霞問誰兄弟是劉家鴈行雲接參差翼庭樹風開
次第花天假聲名喧日月國憑騷雅變浮華曾看晉漢
儒家傳龍虎雖多不足誇

劉商送李元規昆季赴舉詩 見誦甘泉賦心期折桂
歸鳳雛皆五色鴻漸又雙飛別思看衰柳秋風動客衣

明朝問禮處
覽覺鴈行稀

盧綸宴趙氏昆季書院詩
詩禮挹餘波
相歡在琢磨

琴樽方會集
珠玉忽駢羅
謝族風流盛
于門福慶多
花攢騏驎
檻錦絢鳳凰
窠詠雪因饒
妹書經欲換
鵝仍聞廣練
被更有遠儒
過

晉書孝友傳論
夫天倫之重
共氣分形
心睽則葉
賴荆枝性合
則華承棣萼
乃有推肥代
瘦徇急難之
情讓果同衾
盡歡愉之致
緬窺緗素
載流塵躅者
歟晉氏始

自中朝逮于江左雖百六之災遘及而君子之道未消
孝悌名流猶為繼踵王偉元之行已許季義之立節夏
方盛彥體至性以馳芬庾袞顏含篤友于而宣範自餘
羣士咸標懿德採其遺絢足屬澆風

唐楊炯恒州刺史建昌公王公神道碑 荆枝擢秀棣
萼生光何止平輿之二龍是為賈家之三虎

人部 師

唐白居易和楊郎中賀楊僕射致仕後楊侍郎門生合宴

席上詩 業重關西繼大名恩深闕下遂高情祥鱣降
伴趨庭鯉賀燕飛和出谷鶯范蠡舟中無子弟疏家席
上欠門生可憐玉樹連桃李從古無如此會榮

漢蔡邕郭有道碑序 先生誕膺天衷聰睿明哲孝友
溫恭仁篤慈惠貞固足以幹事隱括足以矯時遂考覽
六經探綜圖緯周流華夏隨集帝學收文武之將墜拯
微言之未絕于時纓綏之徒紳佩之士望形表而影附
聆嘉聲而響和者猶百川之歸巨海鱗介之宗龜龍也

又丈範先生陳仲弓銘序 夫其仁愛溫柔足以孕育
羣生廣大寬容足以包覆無方剛毅強固足以威暴矯
邪正身體化足以陶冶士心先生有此四德故言斯可
法行斯可樂動斯可象靜斯可做是以邦之子弟遐方
後生莫不同情瞻仰由其模範從其趨嚮戾很思和爭
訟化讓雖嚴君猛政迫以刑戮未若先生潛道之速

人部 友

唐權德輿奉酬張鑑閣老雪後過中書見贈輒加兩韻

通簡南省僚舊詩 寓直久叨榮新恩倍若驚風清五
夜永節換一陽生潘鬢年空長齊竽藝本輕常時望連
茹今日劇懸旌枉步歡方接含毫思又縈煩君白雲句
歲晏若為情

梁朱瑒與徐陵請王琳首書 瑒早遭末僚預參下席荷

公

一作降
薛君

之吐握感君

一作荷
魏公

之知遇是用沾

一本
作需巾

拭袂痛可識之顏迴腸疾首切猶生之面伏惟聖恩博
厚明詔爰發赦王經之哭許田橫之墓瑒雖芻蕘竊亦

有心琳往莅壽陽頗存遺愛曾遊江左非無舊德比肩
東閣之吏繼踵西園之賓願歸元彼境還修窀穸庶孤
墳既築或飛銜土之燕豐碑式樹時留墮淚之民近故
舊王綰等已有論牒仰蒙制議不遂所陳昔康公告逝
即肥川而建塋域孫叔云亡仍芍陂而植楸檟由此言之
抑有前例不使壽春城下惟傳報葛之人滄洲島上獨
有悲田之士

唐張九齡上姚令公書

夫見勢則附俗人之所能也

與不妄受志士之所難也君侯察其苟附及不輕受就而厚之因而用之則禽息之首為知己而必碎豫讓之身感國士而能漆至于合如市道庶公之門客盈虛勢比雀羅廷尉之交情貴賤初則許之以死殉體面俱柔終乃背之而飽飛身名已遂小人恒態不可不察

梁劉峻廣絕交論

若其寵鈞董石權壓梁竇雕刻百工

鑪錘萬物吐漱興雲雨呼噏下霜露九域聳其風塵四海疊其燠灼靡不望影星奔藉響川驚鷄人始唱鶴蓋

成陰高門旦開流水接軫皆願摩頂至踵隳膽抽腸約
同要離焚妻子誓殉荆卿湛七族是曰勢交其流一也
富埒陶白貲巨程羅山擅銅陵家藏金穴出平原而聯
騎居里閭而鳴鐘則有窮巷之賓繩樞之子冀宵燭之
末光邀潤屋之微澤魚貫見躍颺沓鱗萃分鴈鶩之稻
粱霑玉笋之餘瀝銜恩遇進款誠援青松以示心指白
水而旌信是曰賄交其流二也陸大夫讌喜西都郭有
道人倫東國公卿貴其藉甚搢紳羨其登仙加以顛順

蹶頰涕唾流沫騁黃馬之劇談縱碧雞之雄辨叙溫燠
則寒谷成暄論嚴苦則春叢零葉飛沈出其顧指榮辱
定其一言于是有弱冠王孫綺紈公子道不挂于通人
聲未適於雲閣攀其鱗翼丐其餘論附駟驥之旄端軼
歸鴻于碣石是曰談交其流三也陽舒陰慘生民大情
憂合歡離品物恒性故魚以泉涸而煦沫鳥因將死而
鳴哀同病相憐綴河上之悲曲恐懼寘懷昭谷風之盛
典斯則斷金由于湫隘刎頸起于苦蓋是以伍員濯漑

于宰詒張王撫翼于陳相是曰窮交其流四也馳騫之
倫澆薄之俗無不操權衡秉纖縵衡所以揣其輕重縵
所以屬其鼻息若衡不能舉縵不能飛雖顏冉龍翰鳳
雛曾史蘭薰雪白舒向金玉淵海卿雲黼黻河漢視若
遊塵遇同土梗莫肯費其半菽罕有落其一毛若衡重
鎔銖縵微影撇雖共工之蒐慝驪飛之掩義南荆之跋
扈東陵之巨猾皆為匍匐逶迤折枝舐痔金膏翠羽將
其意脂膏便辟導其誠故輪蓋所遊必非夷惠之室苞

直所入實行張霍之家謀而後動毫芒寡忒是曰量交
其流五也

周庾信擬連珠 蓋聞廉將軍之客館翟廷尉之高門盈
虛倏忽貴賤何論是以平生故人灌夫不去門下賓客
任安獨存 蓋聞居蘭處庖在其所習白羽素絲隨其
所染是以金性雖質處劍即凶水德雖平經風即險
宋周祗執友箴 四輔揚輝伐木幽林撫喬鸞飛爰逮
姬衰俗遂凋成交緣利昵朋因偽情谷風興哀繁霜夏

零道之未盡弘焉由人自室有迴過門則親微言綿邈
清談輟響金雖能照塵積翳朗西河感離口悟投杖憚
憚文侯友賢好學英英燕昭禮郭致樂推誠歲寒功標
松竹落落僑札遼遼莊惠解帶一愚道映萬世人亦有
言貴則交易利重太山道輕鴻毛久而致敬見之晏平
霜雪既至勁栢冬青

唐楊炯楊去盈墓誌銘

莊公獨歎聞潁叔之純深有道

相推見茅容之盡禮則閨門雍穆以孝聞也輔仁會友

合志同方晏平仲之善交鮑叔牙之知我張琪死日妻
子唯托于朱暉劉恢生平風月每思于玄度則朋友之
德若蘭芬也

人部 宗

唐溫庭筠上首座相公啟 舉不違宗得于王濟近因其
族聞自謝玄雖通人與善之規亦前哲睦親之道 儻
或假一言之甄發隨百摯之昭蘇庶令葛藟之陰均其
煦育椒聊之實遂彼扶疎成鍾儀操樂之規寬顧悌拜

書之戀

李商隱為鄭從事妻李氏祭從父丈 馬援於兒姪之
間一情無異王華在弟兄之列數從猶親

人部 戚

唐蕭穎士登臨河城賦 羊曇是日獨吟零落之篇周翼
終身寧亡吐哺之愛 韓伯懷恩羊曇念昔追北渚之
曩餞歎西州之忽覲曾一顧而不忘况仁深與密戚也
張九齡為王司馬祭妻父丈 謬入郗公之選當荷戴

侯之遇

人部 品藻

周王褒俠客行 京洛出名謳豪俠競交遊河南期四姓
關西謁五侯關雞橫大道走馬出長秋桑陰徒將夕槐
路轉淹留

庾信詩 俠客重連鑣金鞍被挂條細塵障路起驚花
亂眼飄酒醺人半醉汗濕馬全驕歸鞍畏日晚爭路上
河橋

陳良詩 洛陽春色麗遊俠騁輕肥水逐車輪轉塵隨
馬足飛雲影遙臨蓋花氣近薰衣東郊關鷄罷南坡射
雉歸日暮河橋上揚鞭惜晚暉

梁元帝劉生詩 任俠有劉生然諾重西京扶風好驚坐
長安恒借名菊花連夜飲竹葉解朝醒結交李都尉邀
遊佳麗城

陳張正見詩 劉生絕名價豪俠恣遊陪金門四姓聚簫
鼓五香來塵飛瑪瑙勒酒映車渠盃別有追遊夜愁牕

向月開

唐楊炯詩 卿家本六郡年長入三秦
白璧酬知己黃金
謝主人劍鋒生赤電馬足起紅塵
日暮歌鐘發喧喧動
四隣

周庾信和劉儀同詩 止戈興禮樂修文盛典謨
璧開金石篆河浮雲霧圖
芸香上延閣碑石向鴻都
誦書徵博士
明經拜大夫壁池寒水落
學樹舊槐枯高談變白馬
雄辨塞飛狐月落將軍樹
風驚御史烏子雲猶汗簡
溫舒

正削蒲連雲雖有閣終歎想江湖

唐楊炯和劉長史答十九兄詩 帝堯平百姓高祖宅三

秦子弟分河岳衣冠動搢紳盛名恒不隕歷代幾相因
街巷塗山曲門閭洛水濱五龍金作友一子玉為人寶
劍豐城氣明珠魏國珍風飈自落落文質且彬彬共許
刁玄亮同推周伯仁石城俯天闕鍾阜對江津驥足方
遐駛狼心獨未馴鼓鼙鳴九域風火集重闔城勢餘三版
兵威乏四隣居然混玉石直置保松筠耿介酬天子危

言數賊臣鍾儀琴未奏蘇武節猶新受祿寧辭死揚名
不顧身精誠動天地忠義感明神怪鳥來垂翼修蛇竟
暴鱗來朝拜休命迷職下梁岷善政馳金馬嘉聲繞玉
輪三荆忽有贈四海更相親宮徵諧鳴石光輝掩燭銀
山川遙滿目零淚坐霑巾友愛光天下恩波浹後塵懦
夫仰高節下俚繼陽春

盧象贈張員外詩 公家世業昌才子冠裴王出自平

津邸還為吏部郎神仙餘氣色列宿動輝光夜直南宮

靜朝趨北禁長時人窺水鏡明主賜衣裳翰苑飛鸚鵡
天池待鳳凰承欣疇日顧未記後時傷去去圖南遠微
才幸不忘

方干贈趙常詩 貴達合逢明聖日風流又及少年時
才因出衆人皆嫉勢欲摩霄自不知迢遞早年聞苦節
從容此日見清規却教鸚鵡呼桃葉便遣嬋娟唱竹枝
閒話篇章倚燭久醉迷歌舞出花遲雲鴻別有回翔便
應笑啁噍燕雀卑

唐上官儀詔冊周王為并州都督文 識表槐扉之象
詞掩蘭臺之駕西園孤月秀心鏡而齊明小山叢桂偃
情田而並烈溫恭夙勗業尚日新棣萼交芬珪璋具美
簡文與湘東王令 風韻道上神峯標映千里絕跡百
尺無枝

樂明龜賜陳敬暄太尉鐵券文 論清政而水鏡無光
吐赤誠而朝霞失色

梁武帝請徵補謝朓何胤表 家膺鼎食而甘茲橡艾

世襲青紫而安此懸鵲

陸微刺史廣州薦從事朱萬嗣表 年暨知命庶尚愈
高氷心與貪流爭激霜情與晚節彌茂歷宰金山家無
寶鏤之飾連組珠海室靡瑤珥之珍確然守志不求聞
達實足以澄革汚吏洗鏡貪氓

梁元帝法寶聯璧序

似懸鐘之應響猶衢樽之待酌

周宇文道庾信集序 德茂褰帷才膺刺舉吏不敢賄人
不忍欺上洛兒童如迎郭汲商山故老似值劉弘

晉書郭璞傳論 景純篤志綈緗洽聞強記在異書而畢
綜瞻往滯而咸釋情源秀逸思業高竒襲文雅于西朝振
辭鋒于南夏為中興才學之宗矣夫語怪徵神伎成則
賤前修貽訓鄙乎茲道景純之探策定數考往知來邁
京管于前圖軼梓竈于遐篆而官微于世禮薄于時區
區然寄客傲以申懷斯亦伎成之累也

王湛諸人傳論 勝氣籠霄飛譚卷霧

後魏溫子昇寒陵山寺碑序 渤海王命世作宰唯幾

成務標格千仞崖岸萬里運鼎阿于襟抱納山岳于胸
懷擁玄雲以上騰負青天而高引

入印山寺碑序 既而蒼龍入隱白虎出見命世有期
匡時作宰拯沈溺以援手涉波瀾而濡足懸皎日于胸
懷起大風于襟袖動之以仁義行之以忠貞附之者影
從應之者響起

唐李嶠宣州大雲寺碑 或大房學府吐鳳而懷蛟或劒
室珠泉衝星而襲月水火錯居而致用青一作朱藍糝色

而成彩羣務允緝喧北汝之謳謠庶事無留聞南陽之府寺

唐德宗段秀實紀功碑 利刃在手投節皆虛貞松有心老而彌勁

周庾信上柱國齊王憲神道碑 王武子以上將開府未滿立年荀中郎為十州都督才踰弱冠

又大將軍幽國公墓銘 為子則名高五都為臣則光照千里華蓋中天之峯未階其峻虞淵浴日之水不盡

其源

唐楊炯楊去溢墓誌銘 至如白雪迴光清風度曲崔亭

伯真龍之氣揚子雲吐鳳之才莫不玉振金聲筆有餘
力遠心天授高興生知盡江海之良圖得烟霞之祕筭
又從甥梁錡墓誌銘 歷諸侯而說劍直之無前引司

馬而操弓觀者如堵

已上品藻總

梁任昉王文憲集序 年始志學家門禮訓皆折衷於公

孝友之性豈伊喬梓夷雅之體無待韋弦汝郁之幼挺淳

至黃琬之早標聰察曾何足尚

周宇文迪庾信集序 雖桓驎十四之歲答宿客之詩魯
連十二之年杜離堅之辨匪或斯尚同日語哉

楊炯王勃集序 時師百年之學旬日兼之昔人千載
之機立談可見

唐魏徵故邢國公李密墓誌銘 體質貞明機神警悟

五行一覽半面十年

已上
夙慧

郭適人不易知賦 復覽前志清通不易或失子羽之

容或失宰我之議自非識周郎之顧曲辨齊竽之濫吹
安能取士于飯牛之時拔才于卧龍之器聞撤俎而
興歎指負甌而留規管仲霸齊終慟哭于鮑叔國僑相
鄭始登舉于子皮

已上人知人

齊謝朓為東海太守教昔長孫東組降龍丘之節文舉
北輜高通德之稱所以激貪立懦式揚風範

唐駱賓王上司列太常伯啟分庭讓士虛右禮賢片善
經心揖仲宣于蔡席一言合道接然明于鄭階

駱賓王上李少常伯啟

片善必甄揖虞翻于東箭一

言可記許顧榮以南金

駱賓王上兗州刺史啟

求小善于毫芥顧正禮于二

龍振幽滯于泥沙許公明于一驥

李商隱為任侍御史上崔相國啟

孫閣時開邴茵多

怨

又為舉人上翰林蕭侍郎啟

昔管仲經邦賓客有二

周公待士吐握皆三邴丞相之車茵寧彈醉客平津侯

之賓館不礙布衣並脂粉簡編冠纓圖史後之披卷皆
若升堂

又為柳珪謝京兆公啟
玳簪珠履綠水紅蓮成藉藉
于淮山致憧憧于燕路

呂溫湖南都團練副使廳壁記
羣材響附各以類至

大雅之器集作器用歲餘大備錯金碧于晴壑絳孔翠于春

林遐邇翕然稱為盛府中行感會知己竭其誠能黃鍾
音韻調于嶰谷之竹太阿鋒鏑拭以華山之土其吟鸞

鳳斷犀兕不足怪也

員半千蜀州青城縣令達奚君神道碑
採芳草于蘭

澤省靈苗于松澗

楊炯唐恒州刺史建昌公王公神道碑
吐食下士倒

屣迎賓無笑客之美人有拜賓之童隸

已上好士

周庾信大將軍司馬裔碑
渭南千畝之竹更懼盈滿

池陽二頃之田常思止足身歿之日家無餘財素車白

馬狹室崎嶇黃腸玄甲堦庭仄陋有詔冬官為營寢室

朱邑祭酹無所漢后是以賜金陳表妻子露立吳王為之開館

又柱國大將軍拓拔儉神道碑 拔園葵而去織婦無三惑而絕四知一室之中未免虛白日膳之資三杯而已 居常服翫或以布被松牀盤案之間不過桑杯石鼎

唐嚴識玄潭州都督楊志本碑 僦僦五嶠皇皇百越路窮南服境淑西屠握水衡之錢權御府之產歷剖蚌泣

蛟之巨漲窺結綠珊瑚之怪穴自異時魁傑之士以事
而臨其地罕有聲背于黷節全其貞將軍北旋猶見猜
于薏苡大夫南使亦受遺于金裝而公散國財市蠻寶
混之不濁涅而不緇易生人之所難凜然有伯夷之風矣
張說唐故涼州長史元君石柱銘 化澄已渫無侵橘
柚之園教溢河湟不飲蒲萄之酒

已上
廉潔

蘇晉賢良方正策 夫選物化人著誠去偽豈惟君上
之道實亦官聯之職故大翁好儒蜀學比于齊魯毛玠

崇質魏士素其裘裳是知易俗移風使天下迴心而嚮道者非俗吏之所能為也

蘇頲御史大夫贈右丞相程行謀神道碑 含照灼而

更幽蓄堅剛而轉銳常謂處山者猛不採藜藿成蹊者芳不言桃李 悉心果孚履尾奚懼獫豸既制拉二豎于威弧之張神羊既立挫三思于止戈之武固亦霜驅隼勁露落鵬摧

周庾信車騎大將軍贈小司空宇文顯墓誌銘 不聽

雜樂以變齊國之風不食鮮禽以斷荆王之獵

已上方正

人部節義撫

派附

晉書忠義傳論 古人有言君子殺身以成仁不求生

以害仁人云非死之難處死之難信哉斯言也是知隕

節苟合其宜義夫豈吝其沒捐軀若得其所烈士不愛

其存故能守鐵石之深衷厲松筠之雅操見貞心于歲

暮標勁節于嚴風赴鼎鑊其如歸履危亡而不顧書名

竹帛畫象丹青前史以為美談後來仰其徽烈者也晉

自元康之後政亂朝昏禍難荐興艱虞孔熾遂使奸凶
放命戎狄交侵函夏沸騰蒼生塗炭干戈日用戰爭方
興雖背恩忘義之徒不可勝載而蹈節輕生之士無乏
于時至若嵇紹之衛難乘輿卞壺之亡軀鋒鏑桓雄之
義高田叔周崎之節邁解揚羅丁致命于舊君辛吉耻
臣于戎虜張祿引鴆以全節王諒斷臂以厲忠莫不志
烈秋霜精貫白日足以激清風于萬古厲薄俗于當年
者歟所謂亂世識忠臣斯之謂也

宋顏延之陽給事誄 貞不常祐義有必甄處父勤君怨
在登賢苦夷致果題子行間忠壯之烈宜自爾先舊勲
雖廢邑氏遂傳惟邑及氏自溫徂陽孤續既降晉族弗
昌之子之生立績宋皇拳猛沈毅溫敏肅良如彼竹柏
負雪懷霜如彼駢駟配服驂衡 力雖可窮氣不可奪
義立邊疆身終鋒枯嗚呼哀哉賁父隕節魯人是志汧
督効貞晉策攸記皇上嘉悼思存寵異

唐王維臨汝太守贈秘書監韋公神道碑并序 坑七族

而不顧赴五鼎而如歸徇千載之名輕一朝之命烈士之勇也隱身流涕獄急不見南冠而繫遜詞以免北風忽起刎頸送君智士之勇也種族其家則廢先君之嗣戮辱及室則累天子之姻非苟免以全其身思得當有以報漢棄身為餌俯首入橐偽就以亂其謀佯愚以折其僭謝安伺桓溫之亟蔡邕制董卓之邪然後吞藥自裁嘔血而死仁者之勇夫子為之 嗚呼上京既駭法駕大遷天地不仁穀洛方鬪鑿齒入國磨牙食人君子

為投檻之猿小臣若喪家之狗偽疾將遁以猜見囚勺
飲不入者一旬穢溺不離者十月白刃臨者四至赤捧
守者五人刀環築口戟枝入領已上節義

張九齡故光祿大夫右散騎常侍徐文公神道碑 景
倩幼露寶賴愍孫令伯大成抑由祖母

周庾信大將軍司馬裔碑 復壁襁負深山擁樹程嬰
之匿趙武從役家臣王成之藏李燮為傭酒市 年十
有五始幹家事楹前鑿柱即取遺書石上開松仍求故

劔撫孤
附

人部 壽

宋蘇軾宣德郎劉錫永父元年一百四歲可承事郎制
尚齒教民三代之義咨爾百年之故老乃吾六世之
遺民自非吉人莫享上壽張蒼事秦柱下而至漢孝景
思邈生隋開皇而及唐永淳古有其人乃今親見何愛
一命慰其子孫

張正己賀丞相生日啟
五百年而名世有開合德之

符八千歲以為春願罄大年之祝 方國家卜世以無
疆宜福祿自天之未艾慶傳袞烏封誓山河 階符同
耀拱宸極以常尊神岳比崇鎮坤輿而並固

播芳大全代胡侍郎謝朝士賀生日啟 五十之年過
二應憐坡老之衰三萬之日無多欲擬茶山之老華其斑
白飾以青黃人情欲壽欲安顧所蒙矣君子善頌善禱
何以報之

歐陽修聖節五方老人祝壽文 但某太山老叟東海

真仙

一字有

溜穿石而曾究初終

一字有

松避雨而備知歲

月羲氏定三百六日嘗守寅賓之官夷吾紀七十二君

盡觀登封之事遇安期而遺棗笑方朔之偷桃風入律

而來自巖前斗指春而光臨洞口昔漢武帝嘗懷三島

之勝遊有羨門生欲謁巨公于昭代今則紫庭降聖華

渚開祥遠離朝日之方來展望雲之覬千八百國咸歸

至治之風億萬斯年共禱無疆之壽遙望天庭敢進祝

聖之頌

東海蓬萊第一仙遙瞻西北祝堯天願皇長似東君壽
與物為春億萬年

右東方
老人

但某秦川故老華岳幽人詢仙掌之遺蹤咸知始末戀
蓮峯之絕頂不記歲時漱流玉乳之泉枕石雲陽之洞
逍遙物外笑傲林間奉王母之蟠桃嘗延漢帝指老聃
之仙李永佑唐基掌中五色之凡世上千年之壽欣逢
聖代來至塵寰當洪河澄九曲之時是甲觀誕一人之
日祥麟遊于泰時天馬來于大宛景星見而朱草生瑞

露降而赤鳥集既遇無為之化宜歌有道之君是以駕
青牛而度函關指丹鳳而趨魏闕唯願慶源流遠齊河
海以無窮睿算綿長等乾坤而不老遙望天庭敢進祝
聖之頌

華岳峯頭萬葉蓮開花今古世相傳願皇長似蓮峯久

結實盤根不記年

右西方
老人

但某棲心嵩極振迹伊川年高而可等松椿氣粹而嘗
飡芝朮洞裏之煙霞不老壺中之日月偏長當聖主之

盛時居天心之奧壤但見璿璣運而寒暑正土圭測而
陰陽和冠帶被于百蠻玉帛來于萬國龍在沼而麟在
藪河出圖而洛出書民跡壽域之中俗樂春臺之上今
則堯眉誕秀舜目開祥遠離王屋之間來入帝畿之內
仰瞻天表莫非嶽降之神上祝皇圖豈止山呼之歲遙
望天庭敢進祝聖之頌

嵩高維嶽鎮中天王氣盤基降壽仙惟願吾皇等嵩嶽

三靈齊祝萬斯年

右中央
老人

但某託迹炎洲遊神衡嶽非海濱之野史乃星極之老人當火德為治之朝是離明繼照之日里社鳴而聖人出泰階正而王道平百蠻向風重譯來貢屢覩豐年之上瑞故知百姓之懽心鼓腹而歌治世之音安以樂曲肱而枕化國之日舒以長斯可謂唐虞之民又豈止成康之俗今則流虹誕聖遶電開祥來趨北闕之前上祝南山之永雲翔霧集既羅仙籍之班地久天長以禱皇家之祚遙望天庭敢進祝聖之頌

南極星中一老人南山為壽祝吾君願君永奏南薰曲

當使淳音萬國聞

右南方
老人

但某修真北嶽常傾葵藿之心混俗幽都不避草茅之
迹潛神自得味道為娛易水歌風魯識荆軻于往歲燕
山勒石親逢寶憲于當年仙家之景物常春人世之光
華易老華表之鶴未久還來蓮葉之龜于時屢見且處
積陰之境每舒就日之誠望千呂之青雲慶流虹于華
渚當萬域來王之際是千齡誕聖之初是以歷沙漠而

朝宗叩天關而祝頌惟願慶基不朽永齊金石之堅寶
祚無疆更等山河之固遙望天庭敢進祝聖之頌

北嶽神仙九轉丹持來北闕獻君前願將北極齊君壽

萬國陶陶共戴天

右北方
老人

人部 棲逸

唐王績遊北山賦 南山故情老而彌篤東坡餘業悠哉
自寧酒甕多于步兵秫田廣于彭澤皇甫謐之心事攏
畝終焉仲長統之規模園林幸足 歷丹危而尋捷徑

攀翠險而覓修塗聳飛情于遐道振逸想于烟衢 况
乃幽谷藏真傍無四隣紫房半掩玄壇尚新逢閩風之
逸客直蓬萊之故人忽據梧而策杖亦披裘而負薪荷
衣薜帶藜杖葛巾出芝田而計畝入桃源而問津昆丘
若礪渤澥揚塵栽碧柰而何日種瓊瓜而幾春自然詭
異非徒隱淪乃有上元仙骨大清神手走電奔雷耘空
蒔朽河間之業不齊貫淮南之術無虛受祝動南極符
迴北斗僊侶贈藥麻姑送酒青龍就食於甲辰玄牛自

拘於乙丑永懷世事天長地久瞻顧流俗紅顏白首儻
千秋之可營亦何為而自輕 拭丹爐而調石髓衰翠
釜而出金精珠流玉結雪耀霜明咸謂刀圭暫近足使
雲車下迎 雲峯龜甲而重聚霞岫龍鱗而結絡水出
浦而潺潺霧含川而漠漠是忻是賞爰遊爰豫結蘿幌
而迎宵敞茅軒而待曙爾其雜樹相糾長條交茹葉動
猿來花驚鳥去起公子之殊賞澹王孫之遠慮山水幽
尋風雲路深蘭窗左闌茵閣斜臨石當堦而虎踞泉映

牖而龍吟月照南浦煙生北林閱丘壑之新趣縱江湖

之舊心道集吾室風吹我襟許由避地張超成市察

俗刪詩依經正史康成負笈而相繼根矩樞衣而未已

組帶青衿鏘鏘儼儼階庭禮樂生徒杞梓山似尼丘泉

凝洙泗丘園散誕窟室徘徊坐等枯木心同死灰亦

有山羞野饌蘭漿木麩杞葉煎羹松根溜醪既採藥而

為食諒隨情而不矯負鍾春前腰鑣歲杪草漸密而饒

蟬樹彌高而足鳥地寂寞而森深路縱橫而窈窕野亭

鶴唳山梁雉鳴遠遊之所幽棲之次或抱犢而新來乍
聞鷄而始至藿畦一兩茅齋數四山為險而無人嶺時
平而有地石菌抽葉金芝吐穗鏡執山精刀驅水魅泉
繞砌而魚躍樹橫窗而鳥萃天網何寬人生幾難飲河
知足巢林必安亦何榮于拾紫亦何羨于還丹紅藜促
節之仗綠籜斑文之冠野飧二簋園蔬一盤送阮籍而
長嘯得劉伶而甚懽曉入柴戶暮歸藥欄老萊地僻鄒
生谷寒楊柳則條垂鍛沼杏樹則花飛坐壇賦或鼓吹

詩如彈丸擣始醉之鳴鶴對新婚之伯鸞我有懷抱蕭
然自保古人則與子同歸紛吾則此焉將老礪溪沿汴
之蘋艾丘陵坂險之梨棗接果移桑栽苗散稻不藏無
用之器不愛非常之寶抵玉驚禽揮金薙草接朋友於
盃案弄兒童于襁褓樂山澤之浮遊笑江潭之枯槁戒
非佞佛齋非媚道無譽無功形骸自空坐成老圃居成
下農身與世而相棄賞隨山而不窮披衣竈北逐食墻
東

皇甫松大隱賦 擁萬卷而笑百城舉簞瓢而歌一室

乃步重水常趨遙林奇峯危臨古木深沈泉出山而

漸淺雲入洞而愈深遇清風而藉席對綠篠以開襟垂

蘿篠寫以膠結連巒菌蠢而相尋望去鶴于沙尾見歸

龍于水心青苔潤而饒露碧梧軟而足陰松脂滴酒樹

嫵薦琴山席平鋪而葉墜書卷橫開而露侵迴首遙壑

松蘿漠漠曲徑抱雲根斜陽遠山脚瀑迸疑懸峯危欲

落歷斷岫而崢嶸入疎林而綺錯委葉交扶盤根相閣

野鼠鬪於林梢山鷄鳴於叢薄蔓勒時縈壁危或拓
出入烟蘿徊翔寥廓山泉鳴而入夜洞花寒而變春
閒遊諳野蔬食慣貧盤中之周生紫萼嶺上之陶公白
雲野岸波澄蓬門露曉徘徊綠水之際蕭洒青林之表
杞根成狗蘿葉垂鳶山鹿奔而草低野鶴飛而桂裊溪
外負薪田中荷蓀鶉披子夏之衣蛙鳴稚圭之沼壠畝
連延桑麻繚繞入崦而朽竹芟疎出溪而茅茨稀少依
林壑以終焉經沼沚而留連花坡籬而綿絡瀑鳴山而

布懸潭中則鱖魚躍日洞裏則沈鹿叫煙過山客以停
杖逢沙禽而駐船槎崩水沒樹空籬穿雉雒霧日囂鳴
雨天灌於陵之藥圃耕彭澤之黍田偷閒散于一日役
筋骸于百年開山決水澆蘭蒔芷移風桂于嶺頭種煙
簞于澗裏浪湍沈舟苔生濕地山廩空而鼠喧野浪高
而鷗喜或曲岸而流觴或平崖而隱几 白鷗兩岸青
莎一床 或刺舟而共去或駕犢而相從採藥于巖下
行歌于里中兒童目以痴叔鄉人指作愚公怪蔣詡之

徑狹笑孫登之室空昔者梁伯鸞之牧猪馬仲圭之星
兔毛公隱身于博徒嚴生攻書于卜舖咸蓄奇聲共沈
高步

陸龜蒙幽居賦 遂求衡泌聊以棲遲建一畝之宮忝
稱儒者置千金之產雅叶中人晏子以器塵可容曹公
以泥水自蔽羅含宋玉嘗戾止於荆蠻蕭相武侯亦潛
安于僻巷楊德祖家唯弱柳殷仲文庭只枯槐馮衍豈
辛繁欽苔碧復有稻名半夏藥號恒春長榆是降星精

修竹乃生雲母潘尼館裏嘗聞柰素瓜甘庾信園中亦
信棗酸梨酢切觀流詠雅尚清風古今攸同聖賢何遠
武仲遊于沛澤伊尹耕于有莘余欲無言回不願仕神
交六位方為賣卜之人歌動五噫竟作賃春之客 龜
床鹿憤訝招隱兮何遲橡飯菁羹笑謀生之太簡 名
安可釣筆不堪耕 顏垣抱碧無非海髮山衣暗坐飄
紅盡是松脂桂蠹加以籬邊種菊堂後生萱覆井之新
桐乍引臨窗之舊竹猶存花姑過帽柳礙移門夢去而

雲遮絕洞樵歸而水遠孤村遇景逍遙就魚鳥之情樂
開襟散誕見羲皇之道尊 讀仙氏之琅書安能解慍
傾洛公之金醴幾得消憂 清樽方灑于遙水寶瑟坐
凝于華月

周庾信奉和趙王隱士詩 洛陽徵五隱東都別二賢雲
氣浮函谷星光集潁川霸陵採樵路成都賣卜錢鹿裘
披稍裂藜床坐欲穿阮籍推長嘯稽康訝下絃澗險無
平石山深足細泉低松猶百尺少鶴已千年野鳥繁絃

轉山花焰火燃雖無亭長識終見野人船

庾信奉報窮秋寄隱士詩 王倪逢齧缺桀溺遇長沮

藜床負日卧麥隴帶經鋤自然曲水几無名科斗書聚
花聊飼雀穿池試養魚小徑治澁路低田補壞渠秋水
牽沙落寒藤抱樹踈空枉平原騎來過仲蔚廬

庾信尋周處士弘讓詩 欣逢赤松遊披林對一丘梨

紅大谷晚挂白小山秋石鏡菱花發桐門琴曲愁泉飛
疑度雨雲積似重樓王孫若不去山中定可留

唐司空曙過終南山柳處士詩 雲起山蒼蒼林居蘿薜

荒幽人老深境素髮與青裳雨滌莓苔綠風搖菡萏香
洞泉分派淺巖笋出叢長敗屨安松砌餘碁在石牀書
名一為別還路已堪傷

周庾信贈周處士詩 九丹開石室三徑沒荒林仙人翻
可見隱士更難尋籬下黃花菊丘中白雪琴方欣松葉
酒自和遊仙吟

唐釋皎然山居寄呈吳處士詩 山事由來別只應中

老身寒園掃綻栗秋浪拾乾薪領鶴閒書竹誇雲笑向
人俗家相去遠野水作東隣

王績贈李徵君大壽詩 孔淳辭散騎陸昶謝中郎幅
巾朝帝罷策杖去官忙附車還趙郡乘船向武昌九徵
書未已十辟譽彌彰副君迎綺季天子送嚴光霸陵幽
徑近磻溪隱路長編蓬還作室績草更為裳會稽置樵
處蘭陵賣藥行看書惟道德開教止農桑別有懷幽侶
由來高讓王前年辭厚幣今歲返寒鄉有書橫石架無

羶坐土牀蘭英猶足釀竹實本無糧澗松攀轉直山菊
秋自香管寧存祭禮王霸重朝章去去相隨去披裘驕
盛唐

李白贈盧徵君鴻詩 陶令辭彭澤梁鴻入會稽我尋
高士傳君與古人齊雲卧留丹壑天書降紫泥不知楊
伯起早晚向關西

釋理瑩送戴三徵君還谷口舊居詩 巖穴多遺秀弓
車屢遠招周王尊渭叟潁客傲唐堯出處天波洽關河

地勢遙瞻星吳郡夜作霧華山朝清論虛重席閒居挂
一瓢漁歌思坐酌宸渥寵行輶春為荷裳暖霜因葛履
消層崖懸瀑溜萬壑振清飆谷鳥猶遷木場駒正食苗
謝安何日起台鼎佇君調

錢起送溫逸人詩 垂白無名老何年此陸沈丘園應
得性婚嫁不縈心歲計因山薄霞棲在谷深設置連草
色曝藥避松陰觸興雲生岫隨耕鳥下林搢頤笑來客
頭上有朝簪

張籍和盧常侍寄華山鄭隱者詩 獨憶三峰下年深
學鍊丹一間松葉屋數片石花冠酒待山中飲琴將洞
內彈開門移遠竹剪草出幽蘭荒壁通泉架晴崖曬藥
壇寧知騎省客長向白雲看

張籍酬李僕射春日見示詩 戟戶洞初晨鶯聲雨後
頻虛庭清氣在衆藥濕光新魚動芳池面苔侵老竹身
教鋪嘗酒處自問採花人獨此長多病閒居欲過春今
朝聽高韻忽覺離埃塵

許渾寄題商洛王隱士居詩 近逢商洛客知爾住南
塘草閣平春水柴門掩夕陽尋蜂收野蜜隨麝拾生香
更憶前年別松花滿石床

李羣玉送隱者歸羅浮詩 春山杳杳日遲遲露入雲峯
白犬隨兩卷囊書留貰酒一柯樵斧坐看菖蓬菜道士
飛霞札清遠仙人寄好詩自此塵寰音信斷山川風月
永相思

溫庭筠西江上送漁父詩 却逐巖光向若耶釣綸菱

棹寄年華三秋梅雨愁楓葉一夜篷舟宿葦花不見水
雲應有夢偶隨烟鳥便成家白蘋風起樓船暮江燕雙
雙五兩斜

許渾題韋處士山居詩 剗藥去還歸家人半掩扉山
風藤子落溪雨豆花肥寺遠僧來少橋危客過稀不聞
碁杵動應解剪荷衣

溫庭筠處士盧岵山居詩 西溪問樵客遙識主人家
古樹老連石急泉清露沙千峯隨雨暗一徑入雲斜日

暮鳥飛散滿山蕎麥花

皮日休李處士郊居詩 石衣如髮小溪清溪上柴門

架樹成園裏水流澆竹響窗中人靜下棋聲幾多狎鳥
皆諳性無限幽花未得名滿引紅螺詩一首劉楨失却
病心情

劉長卿送鄭山人還廬山別業詩 潯陽數畝宅歸
卧掩柴關谷口何人待門前秋草閒忘機賣藥罷揮手
杖藜還舊筍成寒竹空齋向暮山水流經舍下雲去到

人間桂樹花應發因行寄一攀

李嘉祐送韋山人歸鍾山別業詩 旗亭閱書罷負笈

向桃源萬卷長開帙千山不掩門綠楊垂野渡黃鳥傍
山村念爾能高枕丹墀會一論

皇甫曾送陸鴻漸山人採茶迴詩 千峯待逋客香茗

復叢生採摘知深處烟霞羨獨行幽期山寺遠野飯石
泉清寂寂燃燈火相思一磬聲

梁昭明太子七契 三春蔓戶八桂攢簷華門鳥宿主

竇狐潛風來室搖霧下窗霑

齊孔稚珪北山移文 鍾山之英草堂之靈馳烟驛路勒

移山庭夫以耿介拔俗之標瀟洒出塵之想度白雪以

方潔干青雲而直上吾方知之矣若其亭亭物表皎皎

霞外芥千金而不盼屣萬乘其如脫聞鳳吹于洛浦值

新歌于延瀨固亦有焉豈其始終參差蒼黃翻覆泪翟

子之悲慟朱公之哭乍回迹以心染或先貞而後黷何

其謬哉嗚呼尚生不存仲氏既往山阿寂寥千載誰賞

世有周子儁俗之士既文既博亦玄亦史然而學道東
魯習隱南郭竊吹草堂濫衿北岳誘我松桂欺我雲壑
雖假容于江臯乃纓情于好爵其始至也將欲排巢父
拉許由傲百氏蔑王侯風情張日霜氣橫秋或嘆幽人
長往或怨王孫不游譚空空于釋部覈玄玄于道流務
光何足比涓子不能儔及其鳴騶入谷鶴書赴隴形馳
魄散志變神動爾乃眉軒席次袂聳筵上焚艾製而裂
荷衣抗塵容而走俗狀風寒淒其帶憤石泉咽而下愴

望林巒而有失顧草木而如喪至其紐金章綰墨綬跨
屬城之雄冠百里之首張英風于海甸馳妙譽于浙右
道快長檣法筵久埋敲扑諠囂犯其慮牒訴倥傯裝其懷
琴歌既斷酒賦無續常綢繆于結課每紛綸于折獄籠
張趙于往圖架卓魯于前錄希蹤三輔豪馳聲九州牧
使我高霞孤映明月獨舉青松落陰白雲誰侶澗戶推
絕無與歸石徑荒涼徒延佇至于還飈入幕寫霧出楹
蕙帳空兮夜鶴怨山人去兮曉猿驚昔聞投簪逸海岸

今見解蘭縛塵纓於是南岳獻嘲北隴騰笑列壑爭譏
攢峯竦詭慨游子之我欺悲無人以赴弔故其林慚無
盡澗愧不歇秋桂遣風春蘿擺月騁西山之逸議馳東
臯之素謁今乃促裝下邑浪拽上京雖情投于魏闕或
假步于山扃豈可使芳杜厚顏薜荔無恥碧嶺再辱丹
崖重滓塵游躅于蕙路汙淥池以洗耳宜扃岫幌掩雲
關歛輕霧藏鳴湍截來轅于谷口杜妄轡于郊端於是
叢條瞋膽疊穎怒魄或飛柯以折輪乍低枝而掃迹請

迴俗士駕為君謝逋客

宋洪适通周太尉啟 榆莢生涯菊花歸夢

方岳除兵部架閣制幹謝丞相啟 蠹簡故貧牛衣猶

暖半畦夜雨甘自隨黃犢之鑱兩鬢秋風已不作青山

之夢 芍藥揚州歎已老三生之杜牧桃花觀裏笑重

來前度之劉郎

周王褒與周弘讓書 鏹迹幽蹊銷聲穹谷

祖弘勛與陽休之書 比以家貧親老時還故郡在本

縣之西界有雕山焉其處閒遠水石清麗高巖四匝良
田數頃家先有野舍于斯而遭亂荒廢今復經始即石
成基憑林起棟蘿生映宇泉流繞階月松風草綠庭綺
合日華雲實傍沼星羅簷下流煙共雲氣而舒卷園中
桃李雜椿栢而葱蒨時一褰裳涉澗負杖登峯心悠悠
以孤上身飄飄而將逝杳然不復自知在天地間矣若
此者久之乃還所住孤坐危石撫琴對水獨詠山阿舉
酒望月聽風聲以興思聞鶴唳以動懷企莊生之逍遙

慕尚子之清曠首戴萌蒲身衣縕襜出藝稻梁歸奉慈
親緩步當車無事為貴斯已適矣豈必出塵哉而吾生
既繫名聲之韁鑠就良工之剗劂振佩紫臺之上鼓袖丹
墀之下采金匱之漏簡訪玉山之遺文散精神于丘墳
盡心力於河漢摘藻期之鞏繡發議必在芬香茲自美
耳吾無取焉嘗試論之夫崑峰積玉光澤者前毀瑤山
叢桂芳茂者先折是以東都有挂冕之臣南國見捐情
之士斯豈惡梁錦好疏布哉蓋欲保其七尺終其百年

耳今第官位既達聲華已遠象由齒斃膏用明煎既覽
老氏谷神之譚應體留侯止足之逸若能飜然清尚解
佩捐簪則吾于茲山莊可辦一得把臂入林挂巾垂枝
攜酒登巘舒席平山道素志論舊款訪丹法語玄書斯
亦樂矣何必富貴乎去矣陽子途乖趣別緬尋此旨杳
若天漢已矣哉書不盡意

梁何胤答皇太子書 胤性愛山泉情篤魚鳥而從鷗未
狎入獸相驚兼年齒衰暮荒徑榛梗既無語稼之容寧

有論書之賓緘默畎畝栖息丘壑秀水清潭于茲永已
陶弘景答謝中書書 山川之美古來共譚高峯入雲
清流見底兩岸石壁五色交暉青林翠竹四時俱備曉
霧將歇猿鳥亂鳴夕日欲頽沈鱗競躍實是欲界之僊
都自康樂以來未有能與其奇者

又答趙英才書 隴薪井汲樂有餘歡切松煮朮此外
何務

謝幾卿答湘東王書 本立金羈之飾無假玉璧為資

徒以老使形疎疾令心阻沈滯床簟彌歷七旬夢幻俄
頃憂傷在念竟知無益思自祛遺尋理滌意即以任命
為膏酥鑒鏡照形翻以支離代萱樹故得仰慕徽猷永
言前哲鬼谷深栖接輿高舉遯名屠肆發迹關市其人
緬邈餘流可想

張克與王儉書

介然之志峭聳霜崖確乎之情峯橫

海岸飄纓天闕既謝廊廟之華綴組雲臺終慚衣冠之
秀所以擯跡江臯佯狂隴畔者實由氣岸疏凝情塗狷

隔獨師懷抱不見許于俗人孤秀神崖每遭回于在世
故君山直上感壓于當年叔陽復舉坎壈乎千載克所
以長羣魚鳥畢影松阿半頃之田足以輸稅五畝之宅
樹以桑麻嘯歌于川澤之間諷詠于澠池之上泛濫于
漁父之遊偃息于卜居之下如此而已克何識焉若夫
驚巖暈日壯海逢天竦石崩尋分危落仞桂蘭綺靡叢
雜于山幽松栢陰森環繚于澗曲元卿于是乎不歸伯
休亦以茲長往 若乃飛竿釣渚濯足滄洲獨浪煙霞

高卧風月悠悠琴酒岫遠誰來灼灼大譚空罷方寸不
覺鬱然千里路阻江河每至西風何嘗不眷聊因疾隙
略舉諸襟持此片言輕枉高聽

唐王績答刺史杜之松書 承欲相招講禮聞命驚笑
不能已已豈明公前眷或徒與下走相知不熟也下走
意踈體放抑有由焉兼棄俗遺名為日久矣淵明對酒
非復禮義能拘叔夜攜琴惟以烟霞自適登山臨水邈
矣忘歸譚虛語玄忽焉終夜僻居南渚時來北山兄弟

以俗外相期鄉閭以狂生見待歌去來之作不覺情親

詠招隱之詩惟憂句盡惟天席地友月交風新年則拍

葉為罇仲秋則菊花盈把羅含宅內自有幽蘭數叢孫

綽庭前惟對長松一樹高吟朗嘯挈榼攜壺直與同志

為羣不知老之將至欲令復整理簪屨修束精神揖讓

邦君之門低昂刺史之座遠譚糟粕近棄醇醪必不能

矣亦將恐芻狗貽夢社櫟見朝去矣君侯無落吾事

梁昭明太子陶淵明集序 玉之在山以見珍而終破蘭

之生谷雖無人而自芳故莊周垂釣於濠伯成躬耕於
野或貨海東之藥草或紡江南之落毛譬彼鵠雛豈競
鷦鷯之肉猶斯雜縣寧勞大仲之牲 鼓柁清潭棄機
漢曲

江淹自序 淹字大道濟陽考城人為建安吳興令地
在東南嶠外閩越之舊境也爰有碧水丹山珍木靈草
皆淹平生所至愛不覺行路之遠也山中無事專與道
書為偶及悠然獨往或日夕忘歸放浪之際頗著文章

自娛常願卜居築宇絕棄人事苑以丹林池以綠水左
倚郊甸右帶瀛澤青春受謝則接武平皋素秋澄景則
獨酌虛室侍姬三四趙女數人否則逍遙經紀彈琴詠
詩朝露夕月忽忘老之將至云爾淹之學盡此而已矣
唐王勃山亭宴序 山人對興即是桃花之源隱士相逢
不異菖蒲之澗黃精野饌赤石神脂玉案金盤徵石髓
于蛟龍之窟山樽野酌求玉液于蓬萊之峰溪橫燕尾
巖豎龍頭鍛野老之真珠掛幽人之明鏡山腰半折溜

王烈之香膏洞口橫開滴嚴遵之芳乳藤牽赤紫南方
之物產可知粉隤青田外域之謠風在即人高調遠地
爽氣清 漢家二百所之都郭宮殿平看秦氏四十郡
之封畿山河坐見班孟堅騁兩京雄筆以為天地之奧
區張平子奮一代宏才以為帝王之神麗珠城隱隱闌
干象北斗之宮清渭澄澄滉漾即天河之水長松茂栢
鑽宇宙而頓風雲大壑橫溪吐江河而懸日月鳳凰神
嶽起煙霧而當軒鸚鵡春泉雜風花而滿谷

顧雲題致仕武賓客嵩山舊隱詩序 捫危選勝駕

迴栽基鈿走伊波控隱士飲牛之渚螺排緱嶠對仙人

駕鶴之峯移紫府之全模寫清都之勝槩王桃植砌董

杏栽壇帳合蘿高床平石古飛流界練貫幽響於風湍

曙景張屏掛清光于露壑時或春花發盡秋雨晴初虛

籟調風斜窗印月吞露華兮漱煙波而樂天和吟酒賦

兮唱吟歌焉知帝力乃知飛霜匝野冰崖留不死之蠶

烈日熒溟珠岸有不枯之草故能振清風于戚里飛逸

駕于雲逵宜乎與祿產分鑣夷齊結轍比夫吞腥咽腐
懷祿偷安者不亦優乎今則八桂森指五芝零落立松
崖而盡日不見王孫掃石壁以題詩別招逋客

楊盈川羣官尋楊隱居詩序 忽乎將行指林壑而非

遠莞爾而笑覽烟霞而在矚登岡阜踐莓苔阮籍之見
蘇門止聞鸞嘯盧敖之逢高士詎識鳶肩憶桑海而無
時問桃源之易失寒山四絕烟霧蒼蒼古樹千年藤蘿
漠漠

晉庾闡孫登贊 靈巖霞蔚石室鱗構青松標空蘭泉
吐漏龍蒼可游芳津可嗽玄谷蕭寥鳴琴獨奏先生體
之寂坐幽岸凝冰結璞熙陽靡煖潛真內全飛榮外散
凌崖高嘯希風朗彈道有冥廢運有昏消達隱不巖玄
迹不標或曰先生晦德逍遙嵇子秀達英風朗烈道攜
薰秀鮮不玉折兆動初萌妙鑒奇絕翹首丘冥仰想玄
哲

戴逵閒游贊 降及黃綺至于臺尚莫不有以保其太

和肆其天真者也且夫巖嶺高則雲霞之氣鮮林藪深則蕭瑟之音清其可以藻玄瑩素疵其皓然者舍是焉往

庾亮崔徵君贊 夫所謂至人者體包傑量神凝域表該落萬動玄心獨融故能虬驤慶霄而不絀泰龍之轡鳳鳴瑤林而不屈伶倫之網豈必欣太清而樂瓊藹哉顧蹄涔不足以濯神鬚翳蒼不足以翔雲翮是故藐姑有綽約之膚箕阜有高嘯之宇唐勣表于玄亭夏功忘

于虛室

晉書阮籍諸人傳論 帝堯縱許由于埃壚之表光武
舍子陵于潺湲之瀨松蘿任舉用以優賢岩水澄華茲
焉賜隱臣行厥志主有嘉名

梁陶隱居尋山誌 荆門晝掩蓬戶夜開室迷夏草徑
惑春苔庭虛月映琴響風哀夕鳥依簷暮獸爭來時復
歷近隴尋遠巒坐磐石望平原日負障以共隱月披雲
而出山風下松而含曲泉縈石而生文草霏霏以拂露

塵颯颯

集作鹿
颯颯

而來羣捫虛蘿以入谷傍洪潭而比清

照石壁以端色攀桂枝而齊貞函扈蘭而佩蕙及春鳩
之未鳴且含懷以屏氣待惠風而舒情

梁元帝陶弘景碑 昔太和中有所遠游者乃雲霄之

勝賓太虛之選客先生規同矩合實踵高步曩基先構
即駕胥宇千尋危聳憑牖以望奔星百拱高懸倚櫺而
觀朝日飛流界道似天漢之橫波觸石起雲若奇峯之
出岫 碧嶂千嶺清流萬谷景落崖重烟生岫複

裴子野劉虬碑

鑿室林臯面流傍隴咫尺荆衡表裏

巫夢樹蕙滋蘭蕪沒庭中平疇翠湫千里極目信物外
之神區幽居之勝境

蕭綸隱居貞白先生陶君碑

倚巖栖隱依林遁跡交

柯結宇剗徑為門懸崖對溜悲吟灌木深壑絕峭組織
烟霞枕石漱流水禽無撓採藥耦耕野獸不亂逍遙閒
曠放浪陵山嗒然若喪確乎難拔慕遙風于候氏繪
遺像于橋陽勒玄碑而相質騰絳霄之流芳留鳥表

化棄劍凝神徘徊紫氣照耀丹鱗厥跡猶在餘風可遵
結宇依巖貞棲茂草水玉留年華精却老 泉過危
庭峯臨窈洞露凝蘭階雲生桂棟日斜攔席花落窗甕
尚平未反王孫不旋海桑交易陵谷貿遷豐碑有樹遺
烈無騫

人部 游賞

唐范曄競渡賦 飾畫舸以爭麗建綵標而競取聿來肇
自于北津所屆眇期于南浦選孟賁烏獲以用壯酌川

后天吳以潛輔重輕莫異于錙銖先後不差于步武外
希得雋之稱內約疇庸之伍 遠岸天闊乘流鏡清援

枹者氣作于一鼓理棹者伎癢于先鳴聆大呼之始發
若縱施而迅征直衝諒駛于狂兇忽往未殊于駭鯨目
正晝而懼眩浪無風兮歛生鳴輦吹竽上聒天衢如伏
波整旅合水獸于江湖建旗列卒俯映泉室若五利將
軍訪仙師于溟渤攝弄竒以潛駭恒游泳而下逸羣聲
合譟羣手齊力慮勦敵之我先莫遑捨于瞬息乘輕若

在于風馭處疾訝飛于首飭舳艫惟正審流銷之向齊
檝棹翻然亂驚鳧之揮翼

王勃採蓮賦 黛葉青跗煙周五湖紅葩絳蕊電鑠千

里 吳娃越艷鄭婉秦妍感靈翹于上朔悅瑞色于中

年錦帆映浦羅衣塞川飛木蘭之畫楫駕芙蓉之綺船

至若金室麗妃璇宮佚女傷鳳臺之寂寞厭鸞扃之

閒處侍飲南津陪歡北渚見磯岸之紆直覲旌旄之低
舉上苑神池芳林御陂樓陰架汜殿彩乘漪張拜洛之

容衛備橫汾之羽儀
簫鼓發兮龍文動
鱗羽喧兮鷁首移
咸覲粧而麗服各分驚
而並馳蘋紫漿礙荇觸船危
視雲霞之沃蕩望林泉之蔽虧
折紺房與緇葑攬紅葩
及碧枝迴綃裙兮竊獨嘆
步羅襪兮私自竒莫不驚香
悼色畏別傷離復有濯宮
年少期門公子翠髮蛾眉
頰唇皓齒傳粉蘭堂之上
偷香椒屋之裏亦復銜恩
激誓佩寵絨愁承好賜之
珍席奉嬉游之彩旂繡棟
暉兮翠羽帳瑤塘曙兮青
翰舟牽條拾藥沿波汭流
池心寬而

藻薄浦口窄而萍稠和橈姬之衛吹接榜女之齊謳去

復去兮水色夕採復採兮荷華秋 侯家瑣第戚里芳

園穿池灞岸之曲蓄水河陽之源隄防谷口島嶼輾轅

嘉木畢植靈草具繁沈桂北之丹藕播荆南之紫根鬱

萋萋而霧合燦曄曄而霞飏洎乎氣徹都鄙景華川陸

麥雨微涼梅飈淺燠命妖侶于石城嘯娛朋于金谷乃

使綠珠捧棹青琴理舳樽芳醪藉珍餼汎玉潭之瀾漫

遠金渠之隈隩石近水而苔濃岸連山而樹複排芟末

而爭遠託蘆間而競逐赴汨凌波飛桂振羅風低綠榦
水濺黃螺上客喧兮樂未已美人醉兮顏將酡愛蓮色
之如臉願衣香兮勝荷 又若妖姬蕩勝命侶招羣淇
上洛表湘臯汝漬望洲草兮翡翠色動浦水兮驪龍文
願解珮以邀子思褰裳而從君憐曙野之絳氣愛晴天
之碧雲棹巡汀而柳拂船向渚而菱分掇翠莖以翳景
襲朱萼以為裙 艇怯奔潮篙憎淺石絲著手而偏遶
刺牽衣而屢襜 貴子王孫乘閒縱觀何平叔之符彩

潘安仁之藻翰稅龍馬於金堤命鳧舟於石岸錦纜翻
洒銀樯照爛日側光沈風驚浪深快北渚之新贈恣東溪
之密尋鴛鴦繡彩之文履玳瑁瓊華之寶琴扣舷擊榜
吳歆越吟溱與洧兮葉履水準與濟兮花冒潯值明月
之夕出逢丹霞之夜臨茱萸歌兮軫妾思芍藥贈兮傷
人心宜其色震百草香奪九芝栖碧羽之神爵負青
隄之寶龜紫秩流記丹經秘詞豈徒加繡柱之光彩煜
文井之華滋

王勃上巳浮江宴詩

披觀玉京路駐賞金臺趾逸興

懷九仙良辰傾四美松吟白雲際桂馥清溪裏別有江
海心日暮情何已上巳年光促中川興緒遙綠齊山
葉滿紅洩片花銷泉聲喧後澗虹影照前橋遽悲春望
遠江路積波潮

又聖泉宴詩

披襟乘石磴列席俯春泉蘭氣薰山酌

松聲韻野絃影飄垂葉外香度落花前興洽林塘晚重
巖起夕烟

盧照隣三月曲水宴詩 風煙彭澤里山水仲長園由

來棄銅墨本自重琴樽高情邈不嗣雅道今復存有美
光時彥養德坐山樊門開芳杜徑室距桃花源公子黃
金勒仙人紫氣軒長懷去城市高詠狎蘭蓀連沙飛白
鷺孤嶼嘯玄猿日影巖前落雲花江上翻興闌車馬散
林塘夕鳥喧

趙嘏和令狐補闕春日獨遊西街詩 左掖初辭近侍
班馬嘶尋得過街閒映鞭柳色微遮水隨步花枝欲礙

山暖泛鳥聲來席上醉從詩句落人間此時失意哀吟
客更覺風流不可攀

宋之問鳳閣尋勝地詩 西掖持醇酒東山就白雲開
軒綠池映命席紫蘭芬舞度花為伴鶯來管作羣太平
多樂事春物共氤氲

韓翃寄劉太真詩 長安道上落花朝羨爾當年賞事
饒下筇已憐鶯炙美開籠不奈鴨媒驕春衣晚入青楊
巷細馬初過皂莢橋相訪不辭千里遠西風好借水蘭

撓

魏曹植七啓

于是逍遙暇豫忽若忘歸乃使任子垂釣

魏氏發機芳餌沈水輕繳弋飛落翳雲之翔鳥援九淵
之靈龜然後采菱華擢水蘋弄珠蚌戲鮫人諷漢廣之
所詠覲遊女于水濱耀神景于中沚被輕縠之纖羅遺
芳烈而靖步抗皓手而清歌

晉張協七命

携公子而雙遊時娛觀于林麓登翠阜臨

丹谷華草錦繁飛采星燭陽葉春青陰條秋綠華實代

新承意恣觀仰折神鷲俯承朝蘭遡惠風于蘅薄眷椒
塗于瑤壇爾乃浮三翼戲中沚潛鯢駭驚翰起沈絲結
飛矰理挂歸翮于赤霄之表出華鱗于紫淵之裏然後
縱棹隨風弭楫乘波吹孤竹拊雲和淵客唱淮南之曲
榜人奏采菱之歌

魏文帝與吳質書 妙思六經逍遙百氏彈棋閒設終
以博奕高談娛心哀箏順耳馳騁北場旅食南館浮甘
瓜于清泉沈朱李于寒水白日既匿繼以朗月同乘并

載以游後園輿輪徐動賓從無聲清風夜起悲筵微吟
樂往哀來愴然傷懷方今蕤賓紀時景風扇物天氣
和暖衆果具繁時駕而游北遵河曲從者鳴笳以啟路
文學託乘于後車

應璩與滿公琰書 會承來命知諸君子復有漳渠之
會夫漳渠西有伯陽之館北有曠野之望高樹翳朝雲
文禽蔽綠水沙場夷敞清風肅穆是京臺之樂也得無
流而不反乎

宋顏延之三月三日曲水詩序 有詔掌故爰命司厯獻

洛飲之禮具上巳之儀南除輦道北清禁林左關巖墜
右梁潮源畧亭臯跨芝廙苑太液懷魯山松石峻崦葱
翠陰烟游泳之所攢萃翔驟之所往還于是離宮設衛
別殿周徼旌門洞立筵帷接桓閱水環階引池分席春
官聯事蒼靈奉塗然後升秘駕肩緹騎搖玉鑾發流吹
天動神移淵旋雲被以降于行所禮也既而帝暉臨幄
百司定列鳳蓋俄軫紅旗委旂有藪芬藉觴醴泛浮妍

歌妙舞之容銜組樹羽之器三奏四上之調六莖九成
之曲競氣繁聲合變爭節龍文飾轡青翰侍御華裔殷
至觀聽驚集揚袂風山舉袖陰澤靚裝藻野袷服緝川
故以殷賑外區煥衍都內者矣

王融三月三日曲水詩序 既而滅宿澄霞登光辨色
戒道執爰展軫效駕徐鑾警節明鐘暢音七萃連鑣九
旂齊軌建旗拂蜺揚葭振木魚甲煙聚貝胄星羅重英
曲瑤之飾絕景追風之騎昭灼甄部駟駿函列虎視龍

超雷駭電逝轟轟隱隱紛紛軫軫羌難得而稱計爾乃
迴輿駐罕嶽鎮淵渟晬容有穆賓儀式序授几肆筵因
流波而成次蕙肴芳醴任激水而推移葆侑陳階金匏
在席戚奏翹舞籥動邠詩召鳴鳥于弇州追伶倫于嶰
谷發參差于王子傳妙靡于帝江正歌有閔羽觴無筭
上陳景福之賜下獻南山之壽信凱燕之在藻知和樂
于食苹桑榆之陰不居草露之滋方渥

唐王勃秋日宴李處士宅序
庭前柳葉纔聽鳴蟬野外

蘆花行看過雁數人之內幾度琴樽百年之中少時風
月蘭亭有昔時之會竹林無今日之歡

又上巳浮江宴序 兼以上巳芳節雲開勝地大江浩

曠雲山紛糾出重城而振策下長浦而方舟林壑清其
顧盼風雲蕩其懷抱于時序躔青律運啟朱明輕莢秀
而郊戍青落花盡而亭臯晚丹鶯紫蝶候芳晷而騰姿
早燕歸鴻俟迅風而弄影巖暄蕙密野淑蘭滋弱荷抽
紫踈萍泛綠于是儼松舲于石嶼停桂檝于璇潭指林

岸而長懷出河洲而極睇妍粧炫服香驚北渚之風翠
幙玄帷彩綴南津之霧若乃尋曲渚歷迴溪榜謳齊引
漁歌互起飛沙濺石湍流百勢翠嶮丹崖岡巒萬色亦
有銀鈎犯浪掛蘋翼于文竿瓊轄乘波耀錦鱗于畫網
鍾期在聽玄雲白雪之琴阮籍同歸紫桂蒼梧之酌既
而遊盤興遠景促時淹野日照晴山烟送晚方披襟朗
咏餞斜光于碧岫之前散髮高吟對明月于青溪之下
客懷既暢遊思遄征視泉石而如歸佇雲霞而有自昔

周川故事初傳曲路之悲江甸名流始命山陰之筆蓋
遵清轍共舒幽襟俾後之視今亦猶今之視昔

又綿州北亭羣公宴序 離亭北望烟霞生故國之悲
別館南開風雨積他鄉之思于是蒼雲寡色白日無光
沙塵起而桂浦昏鳬鴈下而蘆洲晚傍隣蒼野霜風橘
柚之園斜枕碧潭直斷芙蓉之水

宋之問奉勅從太平公主遊九龍潭尋安平王宴別序
籍桃花而聽時鳥累宿忘歸蔭芳樹而弄春泉窮年

不厭衣冠車馬明日下于春山鸞鶴笙歌今宵共乎芳
月隱淪可作將知心與事違城闕非遙終惜風流雲散
下官少懷微尚早事靈丘踐疇昔之桃源留不能去攀
君王之桂樹情可何之

王勃夏日諸公見尋訪詩序 幽人待士非無北壁之
書隱士迎賓自有西山之饌席門蓬巷佇高士之來遊
叢桂幽蘭喜王孫之相對山南花圃澗北松林黃雀至
而清風生白鶴飛而蒼雲起停琴綠水仲長統之歡娛

置酒青山郭子期之賓客

駱賓王揚州看競渡序 夏日江干駕言臨眺於時桂
舟始泛蘭棹初遊鼓吹咽江山綺羅蔽雲日便娟舞袖
向淶水以全低飄颻歌聲聽清風而更遠是以臨波笑臉
艷出浦之輕蓮映渚蛾眉麗穿波之半月靚粧舊飾此
日爭奇絃管相催茲辰特妙能使洛川迴雪猶賦陳思
巫嶺行雲專稱宋玉凡諸同好請各賦詩

王維暮春太師左丞相諸公于韋氏逍遙谷讌集序

山有姑射人蓋方外海有蓬瀛地非宇下逍遙谷天都
近者王官有之不廢大倫存乎小隱跡空同而身拖朱
紱朝承明而暮宿青靄故可尚也 神臯藉其綠草驪

山啟于朱戶渭之美竹魯之嘉樹雲出其棟水源于室
灞陵下連乎萊地新豐半入于冢林館層巔檻側徑師

古節儉惟新丹堊巖谷先曙羲和不能信其時卉木後

春勾芒不能一其令花逞窈窕蘅臯漣漪

一作超忽

驂御延

佇于叢薄珮玉升降于蒼翠於是外僕告次獸人獻鮮

樽以大罍烹用五鼎木器擁腫卽天姿以為飾治毛蘋
蘩在山羞而可薦伶人在位曼姬始穀齊瑟慷慨于座
右趙舞徘徊于白雲袞旒松風珠翠煙露日在濛汜羣
山夕嵐猶有濯纓清歌據梧高咏與松喬為伍是羲皇
上人且三代之後而其君舜帝九服之內而其俗華胥
上客則冠冕巢由主人則弟兄元愷合是四美同乎一
時廢而不書罪在司禮竊賢楚傳常諧茅堂之居仰謝
右軍忽序蘭亭之事蓋不獲命豈曰能賢

王勃遊山廟序 雅厭城闕酷嗜江海常學仙經博涉
道記知軒冕可以理隔鸞鳳可以術待而事親多衣食
之虞登朝有聲利之迫清識滯于煩城仙骨摧于俗境
嗚呼阮籍意踈嵇康體放有自來矣常恐運促風火身
非金石遂令林壑交喪烟霞版蕩此僕所以懷泉塗而
惴恐臨山河而歎息者也

人部別

梁簡文帝餞別詩 行樂此南皮讌餞臨華池籜解篁

開節花暗鳥迷枝
窗陰隨影度水色帶風移
徒命銜盃酒終成憫別離

梁簡文帝傷離新體詩

傷離復傷離別後情鬱紆悽

悽隱去掉憫憫愴還途還途意不申
轉顧獨霑巾前驅經御宿後騎
歷河湑朱旗翼還憶清笳送後塵
落日斜飛蓋餘暉承畫輪
柳影長橫路槐枝深隱人
桂宮夕掩銅龍扉甲館霄垂雲
母幃朧朧月色上的的夜螢飛
草香襲余袂露灑霑人衣
帶堞凌城雲亂聚排枝度葉鳥

爭歸盆中浮蟻不能酌琴間玉徽調別鶴別鶴千里別
離聲絃調軫急心自驚試起登南樓還向華池遊前時
篠生今欲合近日栽荷尚不抽猶是銜盃共賞處今茲
對此獨生愁樓高望暖暖山川自分態偃師雖北連轅
轅已南背遠聽寂無聞遙瞻目有礙含毫意不迷長歎
情無賴

沈約送別友人詩 君東我亦西街悲涕如霰浮雲一
南北何由展言宴方作異鄉人贈子同心扇遙裔發海

鴻連翩出簷燕春秋更去來參差不相見

吳均同柳吳興烏亭集送柳舍人詩 河陽一悵望南

浦送將歸雲山離掩暖花霧共依霏流連反舌嘆下上

陽禽飛桂舟無淹世玉軫有離徽願君嗣蘭杜時拂東

臯薇

吳均同柳吳興何山集送劉餘杭詩 王孫重離別置

酒峯之巖逶迤川上草參差澗裏薇輕雲紉遠岫細雨

沐山衣簷端水禽息窗上野螢飛君隨綠波遠我逐清

風歸

吳均酬別江主簿屯騎詩 有客告將離贈言重蘭蕙
泛舟當泛濟結交當結桂濟水有清源桂樹多芳根毛
公與朱亥俱在信陵門趙瑟鳳凰柱吳醵金罍樽我有
北山志留連為報恩夫君皆逸翮搏景復凌騫白雲間
海樹秋日暗平原寒蟲鳴趯趯落葉飛翻翻何用贈分
首自有北堂萱

吳均酬別詩 故人杯酒別天清明月亮露下寒草中

風起秋江上衣染潺湲泣棹犯參差浪七首直千金七
寶雕華壯生離何用表賴此持相餉

朱超別劉孝先詩 疲疴積未瘳伏枕掩長愁復念夜
分手江上值徂秋陰凝變遠色落葉泛寒流繁霜積曉
纜輕冰繞夜舟曳裾出兔苑引領望龍樓勿念荆臺側
無為戚情遊

王僧孺新林送劉之遴詩 旆轉黃山路舟纒白馬津
送輪時合憶分驂各背塵常山喜臨岱隴頭悲望秦欲

持漢中策還以寄征人

范雲送沈記室夜別詩 桂水澄夜氣桂山清曉雲秋

風兩鄉怨秋月千里分寒芝寧共採霜猿行獨聞捫蘿
勿遺我折桂方思君

范雲別詩 孤煙起新豐候鴈出雲中草低金城霧木
下玉門風別君河初滿思君月屢空折桂衡山北摘蘭
湘水東蘭摘心焉寄桂折意誰通

陳徐陵別毛尚書詩 顧子厲風規歸來振羽儀嗟余今

老病此別畏長離白馬君來哭黃泉我詎知徒勞脫寶劍空掛隴頭枝

徐陵秋日別庾正員詩 征途愁轉旆連騎慘停鑣朔氣陵疎木江風送上潮青雀離帆遠朱鷺別路遙唯有當秋月夜夜上河橋

周王褒別陸子雲詩 解纜出南浦征棹且凌晨還看分手處唯餘送別人中流搖蓋影邊江落騎塵平湖開曙日細柳發新春滄波不可望行雲聊共因

庾信別張洗馬樞詩 別席慘無言離愁兩相顧君登

蘇武橋我見楊朱路關山負雪行河水乘冰渡顧子著
朱鳶知余在玄兔

陳江總別袁昌州詩 河梁望壘頭分手路悠悠徂年驚
若電別日欲成秋黃鵠飛飛遠青山去去愁不言雲雨
散更似東西流

唐王勃餞韋兵曹詩 征驂臨野吹別袂慘江垂川霽浮
烟斂山明落照移鷹風彫晚葉蟬露泣秋枝亭皋分遠

望延想間雲涯

王勃羈遊餞別詩 客心懸隴路遊子倦江干
槿濃朝砌靜篠密夜窗寒琴聲銷別恨風景駐離歡
寧覺山川遠悠悠旅思難

楊炯送臨津房少府詩 歧路三秋別江津萬里長
煙霞駐征蓋絃奏促飛觴階樹含斜日池風泛早涼
贈言未終竟流涕忽霑裳

楊炯送豐城王少府詩 愁結亂如麻長天照落霞
離

亭隱喬樹溝水浸平沙左尉才何屈東關望漸賒行看
轉牛斗持此報張華

楊炯送劉校書從軍詩 天將下三宮星門召五戎坐
謀資廟畧飛檄佇大雄赤土流星劍烏號明月弓秋陰
生蜀道殺氣繞湟中風雨何年別琴樽此日同離亭不
可望溝水自西東

盧照隣還京贈別詩 風月清江夜山水白雲朝萬里
同為客三秋契不彫戲鳬分斷岸歸騎別高標一去仙

橋道還望錦城遙

盧照隣送幽州陳參軍赴任寄呈鄉曲故老詩 薊北
三千里關西二十年馮唐猶在漢樂毅不歸燕人同黃
鶴遠鄉共白雲連郭隗池臺處昭王樽酒前故人當已
老舊壑幾成田紅顏如昨日衰鬢似秋天西蜀橋應毀
東周石尚全灞池水猶綠榆關月早圓塞雲初上鴈庭
樹欲銷蟬送君之舊國揮涕獨潛然

駱賓王送吳七遊蜀詩

日觀分齊壤星橋接蜀門桃

花嘶別路竹葉瀉離樽
夏去蘭猶老秋深柳尚繁
霧銷山望迴風高野聽喧
勞歌徒欲奏贈別竟無言
惟有當秋月空照野人園

宗史別詩 別酒正參差
乖情將陸離悵焉臨桂苑
愍然瞻華池輕雲流惠彩
時雨亂清漪耿耿追蘭徑
悠悠結芳枝眷言終可託
心寄方在斯

盧照隣西使兼送孟學士南遊詩
地道巴陵北天山弱水東
相看餘萬里共倚一征篷
零雨悲王粲清樽別孔

融徘徊聞夜鶴悵望待秋鴻
骨肉胡秦外風塵關塞中
惟餘劒鋒在耿耿氣成虹

盧照隣還赴蜀中貽示京邑遊好詩
簾宿花初滿章臺柳向飛如何正此日還望昔多違
悵別風期阻將乖雲會稀
斂衽辭丹闕懸旗陟翠微
野禽喧戍鼓春草變征衣
回顧長安道關山起夕霏

駱賓王別李嶠詩
芳樽徒自滿別恨轉難勝
客似遊江岸人疑上瀟陵
寒更承夜永涼景向秋澄
離心何以

贈自有玉壺冰

陳子昂春夜別友人詩 銀燭吐青烟金樽對綺筵離
堂思琴瑟別路遶山川明月隱高樹長河沒曉天悠悠
洛陽道此會在何年

宋之問漢江宴別詩 漢廣不分天舟移杳若仙秋虹
映晚日江鶴弄晴烟積水浮冠蓋搖風逐管絃嬉遊不
可極留恨此山川

宋之問渡吳江別王長史詩 倚棹望茲川銷魂獨黯

然鄉連江北樹雲斷日南天
劍別龍初沒書成鴈不傳
離舟意無限催渡復催年

李白天夜別張伍詩 吾多張公子別酌酣高堂聽歌舞
銀燭把酒輕羅霜橫笛弄秋水琵琶彈陌桑龍泉解錦
帶為爾傾千觴

李白江夏別宋之悌詩 楚水秋若空遙將碧海通人
分千里外興在一杯中
谷鳥吟晴日江猿嘯晚風平生
不下淚於此泣無窮

岑參趙少尹南亭送鄭侍御歸東臺詩 江亭酒筵香
白面繡衣郎砌冷蟲喧座簾疎雨到床鐘催離興急絃
逐醉歌長關樹應先落隨君滿路霜

陳子昂送客詩 故人洞庭去楊柳春風生相送河洲
晚蒼茫別思盈白蘋已堪把綠芷復含榮江南多桂樹
歸客贈生平

陳子昂送別陶七詩 黃鸝烟雲去清江琴酒同離帆
方楚越溝水復西東芙蓉生夏浦楊柳送春風明日相

思慮應對菊花叢

李嶠送光祿劉主簿之洛詩 函谷雙嶠右伊川二陝

東仙舟宵將隔芳尊暫云同朋席餘歡盡大房舊侶空
他鄉千里月岐路九秋風背檣嘶班馬分洲叫斷鴻別
後青山外相望白雲中

李嶠餞駱四詩 平生何以樂斗酒夜相逢曲中驚別
緒醉裏失愁容星月懸秋漢風霜入曙鍾明日臨溝水
青山幾萬重

徐彥伯餞唐州高使君赴任詩 桐栢膺新命芝蘭惜

舊遊鳴皋夜鶴在遷木早鶯求傳擁淮源路樽空灞水
流落花紛送遠春色別離憂

李適餞許州宋司馬赴任詩 國為休徵選輿因仲舉
題山川襄野隔朋酒灞亭暎零雨征車警秋風別驥嘶
離歌一曲罷愁向勿悽悽

徐堅餞許州宋司馬赴任詩 舊許星車轉神京祖帳
開斷煙傷別望寒雨送離杯辭燕依空遠賓鴻入聽哀

分襟與秋氣日夕共悲哉

宋之問送合宮蘇明府詩

鉉府誕英規公才天下知

謂乘羔鴈族繼入鳳凰池赤縣求人隱青門起路岐
迴車少別鳬化鳥遙馳神哭周南境重歌豫北垂賢哉
荀奉倩職衮佇來儀

宋之問送楊六望赴金水詩

借問梁山道嶽岑幾

萬重遙州刀作字絕壁劍為峯惜別路窮此留歡意不
從憂來生白髮時晚愛青松勿以西南遠夷歌寢盛容

台階有高位寧復久臨卽

宋之問送杜審言詩 臥病人事絕聞君萬里行河橋
不相送江樹遠含情別路追孫楚維舟弔屈平可惜龍
泉劍流落在豐城

張九齡送別鄉人南還詩 橘柚南中煖桑榆北地陰
何言榮落異因見別離心吾亦江鄉子思歸夢寐深聞
君去水宿結思渺雲林牽綴從浮事遲迴謝所欽東南
行舫遠秋浦念猿吟

季明泛江送客詩

二月頻送客東津江欲平烟花山

際重舟檝浪前輕淚逐勸盃落愁連吹笛生離筵不隔
日那得易為情

李白送袁明府任長江詩

別離楊柳青樽酒表丹誠

古道攜琴去深山見峽迎暖風花繞樹秋雨草沿城自
此長江內無因夜犬驚

劉長卿送柳使君赴袁州詩

宜陽出守新恩至京口

因家始願違五柳閉門高士去三苗按節遠人歸月明

江路聞猿斷花暗山城見吏稀惟有郡齋窗裏岫朝朝
空對謝玄暉

朱頎送竇參軍詩 城南送歸客舉酒對林巒喧鳥迎
春囀風衣度雨寒桃花開翠幕柳色傍金鞍公子何時
至無令芳草闌

張謂道林寺送莫侍御詩 何處堪留客香林隔翠微
薜蘿通驛騎松竹挂朝衣霜引臺烏集風驚塔鴈飛飲
茶勝飲酒聊以送君歸

楊凝送客東歸詩 君向古營州春風戰地愁草青蒙
別路柳亞拂孤樓人意傷難醉鶯啼咽不流芳菲只合
樂離思返如秋

陳羽西蜀送許中庸歸秦赴舉詩 春色華陽國秦人
此別離驛樓橫水影鄉落入花枝日暖鶯飛好山晴馬
去遲劍門當石隘棧閣入雲危獨鶴心千里貧交酒一
卮桂條攀偃蹇蘭葉藉參差旅夢驚蝴蝶殘芳怨子規
碧霄今夜月惆悵上峨眉

高適送柴司戶充劉鄉判官之嶺外詩 嶺外資雄鎮
朝端寵節旄月卿臨幕府星使出詞曹海對羊城闊山
連象郡高風霜驅瘴癘忠信涉波濤別恨隨流水交情
脫寶刀有才無不適行矣莫徒勞

王昌齡送李濯遊江東詩 清洛日夜漲微風引孤舟
離傷便千里遠夢生江樓楚國橙橘暗吳門烟雨愁東
南具今古歸望山雲秋

劉春虛海上送薛文學詩 日處歸且遠送君東悠悠

滄溟千萬里日夜一孤舟
曠望絕國所微茫天際愁
有時近仙境不定若夢遊
或見青山石孤舟百處秋
前心方杳眇此路獨夷猶
離別惜吾道波澤敬皇休
春浮溪花遠思逐海水流
日暮驪歌後永懷空滄洲

劉長卿送嚴員外詩
春風倚棹闔閭城水國春寒陰

復晴細雨濕衣看不見閒
花落地聽無聲日斜江上孤
帆影草綠湖南萬里情君去
若逢相識問青袍今已悞
儒生

王勃秋晚入洛于畢公宅別道王宴序 既而神馳象

外宴洽寰中白露下而南亭虛蒼烟生而北林晚鷄鷓

始望不及牲牢麋鹿長懷非忘林藪先生負局倦城市

之塵埃遊子橫琴憶汀洲之杜若況乎迹不皆遂時不

再來屬宸駕之方旋值羣公之畢從洛城風景此會無

期戚里一作維嶺笙竽浮懼易盡仰雲霞而道意捨塵事而

論心夏仲御之浮舟願乘春水張季鷹之命駕思動秋

風策藜杖而非遙勅一作整柴車之有日青溪數曲幽人

長往白雲萬里帝鄉難見安貞抱璞已甘心于下走全
忠履道是所望于羣公倘心迹克諧去留咸遂廟堂多
暇迈身滄海之隅軒冕所辭迴首箕山之路尋赤松而
見及泛黃菊以相從雖流水桃花時時失路而幽山桂
樹往往逢人庶公子之來遊幸王孫之畢至茅君待客
自有金壇王烈迎賓還開石架惟恐一丘風月侶山水
而忘年三徑蓬蒿待公卿之來日

宋之間表侍御席餞永昌獨孤少府序 爾乃撰辰開

宴考地疏筵落花覆沼懸藤掃砌竹林以清氣娛賓蘭
畹以芳心愛客環坐三尺起君子之風祖道百壺酌賢
人之酒去留交軫讌詠相喧管召魚樂杯董鵬醉

陳子昂金門餞東平序 昔者漢朝卿士供帳餞于東

都晉國名賢傾城祖于西郊雖時稱盛觀而人非帝族東
平紫微英曹朱邸天人蘊岐嶷之瓌姿得山河之寶氣
劉君愛士常致禮于幽人曹植論文每交歡于數子屬
鑒輿拜日來朝太室之前玉檢停刊言返章華之路羣

公以眷深王粲思邀祖道之歡下走以遇重荀慈謬奉
芳筵之醴于時青陽二月黃鳥羣飛殘霞將落日交暉
遠樹與孤烟共色江山萬里眇然荆楚之塗城邑三春
去矣伊瀝之地既而朱軒不駐綠蓋行遙琴樽之清讌
已疲珠玉之芳言未贈請各陳志以序離襟

人部 傷逝

唐杜甫八哀詩故司徒李公光弼 司徒天寶末北收晉陽
甲胡騎攻吾城愁寂意不愜人安若泰山薊北斷右脅

朔方氣乃蘇黎首見帝業二宮泣西郊九廟起顙壓未
散河陽卒思明偽臣妾復自碣石來火焚乾坤獵高視
笑祿山公又獻大捷異王冊崇勲小敵信所怯擁兵鎮
河汴千里初安帖青蠅紛營營風雨秋一葉內省未入
朝死淚終映睫大屋去高棟長城掃遺堞平生白羽扇
零落蛟龍匣雅望與英姿惻愴槐里接三軍晦光彩烈
士痛稠疊直筆在史臣將來洗箱篋吾思哭孤冢南紀
阻歸櫟扶顛永蕭條未濟失利涉疲荅竟何人灑淚已

東峽

人贈左僕射鄭國公嚴公武詩 鄭公瑚璉器華嶽金
天晶昔在童子日已聞老成名嶽若大賢後復見秀骨
清開口取將相小心事友生閱書百氏盡落筆四座驚
歷職匪父任嫉邪常力爭漢儀尚整肅胡騎忽縱橫飛
傳自河隴逢人問公卿不知萬乘出雪涕風悲鳴受詞
劒閣道謁帝蕭關城寂寞雲臺仗飄飄沙塞旌江山少
使者笳鼓凝皇情壯士血相視忠臣氣不平密論貞觀

體揮發岐陽征感激動四極聯翩收二京西郊牛酒至
原廟丹青明匡汲俄寵辱衛霍竟哀榮四登會府地三
掌華陽兵京兆空柳色尚書無履聲羣鳥自朝夕白馬
休橫行諸葛蜀人愛文翁儒化成公來雪山重公去雪
山輕記室得何遜韜鈴延子荆四郊失壁壘虛館開逢
迎堂上指圖畫軍中吹玉笙豈無成都酒憂國祇細傾
時觀錦水釣問俗終相并意待犬戎滅人藏紅粟盈以
茲報主願庶獲裨世程炯炯一心在沈沈二豎嬰顏回

竟短折賈誼徒忠貞飛旄出江漢孤舟轉荆衡虛無馬
融笛悵望龍驤瑩空餘老賓客身上愧簪纓

梁沈約悼亡詩 秋去三五月今秋還照梁今春蘭蕙草
春來復吐芳悲哉人道異一謝永銷亡簾屏既毀撤帷
席更施張遊塵掩虛座孤悵覆空牀萬事無不盡徒令
存者傷

陳何胥傷章公大將軍詩 十萬橫行罷三千白日新短
簫應出塞長笛反驚隣槐庭慘芳樹舞閣思陽春所悲

金谷妓坐望玉關人

隋薛德音悼亡詩 鳳樓簫曲斷 桂帳瑟絃空 畫梁纔照
日 銀燭已隨風 苔生履跡處 花沒鏡塵中 惟餘長簾月
永夜何朦朧

陳張正見傷韋侍讀詩 懷經侍北海 蘊義盛西河 高峯
落迴照 逝水役驚波 柳下悲風急 山陽秋氣多 宿草摧
書帶 寒松脆女蘿 無復華陰市 空餘蒿里歌

陰鏗和悼亡詩 畫梁朝日盡 芳樹晚花辭 忽以千金

笑長作九泉悲鏡前塵劇粉機上網多絲戶餘雙入燕
牀有一空帷名香不可得詎見及魂時

江總在陳旦解醒共哭顧舍人詩 獨酌一罇酒高詠

七哀詩何言萬里別非復竹林期階荒鄭公草戶閒董
生惟人隨暮槿落客共晚鶯悲年鬢兩如此傷心詎幾
時

唐褚亮傷始平李少府正已詩 勞息本相循悲歡理自
均誰能免玄夜惜爾正青春邁德惟家寶生才諒國珍

高文綴翡翠茂學掩麒麟述作紛無已言談妙入神
斷腸雖累月分手未盈旬輔嗣俄長往顏生即短辰
聲華滿昭代形影委窮塵禪草迴中使生芻引弔賓
同遊秘府日方駕直城闔並拜黃圖右分曹清渭濱
風朗嵇呂好存沒范張親虛座懷王述遺篇慟景純
精靈與豪翰千祀壽何人

王勃傷裴錄事喪子詩
蘭堦霜候早松露空臺深魄
散珠胎沒芳銷玉樹沈露文晞宿草煙照慘平林焚芝

空歎息流恨滿簾金

盧照隣哭明堂裴主簿詩 締歡三十載通家數百年
潘楊稱代穆秦晉忝姻連風雲洛陽道花月茂陵田相
悲復相樂交騎共交筵始謂調金鼎如何掩玉泉黃公
酒壚處青眼竹林前故琴無復雪新樹但生煙遽痛蘭
襟斷徒令寶劍懸客散同秋葉人亡似夜川送君一長
慟松臺路幾千

盧照隣同崔錄事哭鄭員外詩 大學秋天遠郎官星

位尊伊人表時彥飛譽滿司存楚席光文雅瑤山侍討
論鳳詞陵漢閣龜辨罩周圍已陪東岳駕將近北溟鯤
如何萬化盡空歎九飛魂白馬西京驛青松北海門夜
臺無曉箭朝奠有虛樽一代儒風沒千年隴霧昏梁山
送夫子湘水弔王孫僕本多悲泪沾裳不待援聞君絕
絃曲吞恨更無言

鄭惜哭郎著作詩 詩禮康成學文章賈誼才已年人
得夢庚日鳥為災書草藏天閣琴聲入夜臺荒階羅駁

薛虛座網浮埃白馬賓徒散青鳥隴隧開空憐門下客
懷舊幾遲迴

趙彥昭哭僕射鄂公楊再思詩 兩揆光天秩三朝奉
帝熙何言集大鳥忽此喪元龜坐歎公槐落行聞宰樹
姜壑舟今已去寧有濟川時

王維過山居哭沈居士詩 楊朱來此哭桑戶返於真
獨自成千古依然舊四隣閒簷喧鳥雀故榻滿埃塵曙
月孤鶯轉空山五柳春野花愁對客泉水咽迎人善卷

明時隱默要在日貧逝川嗟爾命丘井歎吾身前後徒
言隔相悲詎幾晨

杜甫哭嚴僕射歸櫬詩 素幔隨流水歸舟返故京老
親如夙昔部曲異平生風送蛟龍雨天長驃騎營一哀
三峽暮遺後見君情

入哭李尚書之芳詩 漳濱與蒿里逝水竟同年欲挂
留徐劔猶迴憶戴船相知成白首此別間黃泉風雨嗟
何及江河涕泣然修文思管輅奉使失張騫史閣行人

在詩家秀句傳客亭鞍馬絕旅櫬網蟲懸復魄昭丘遠
歸魂素澹偏樵蘇封墓地喉舌罷朝天秋色凋春草王
孫若箇邊

劉長卿雙峯下哭故人李宥詩 憐君孤塚寄雙峯埋
骨窮泉復幾重白露空沾九原草青山獨閉數株松圖
書經亂知何在妻子移家失所從惆悵東皋却歸去人
生無處更相逢

又哭張員外繼詩 慟哭鍾陵下東流與別離二星來

不逐雙劍沒相隨獨繼先賢傳誰刊有道碑故園荒峴
曲旅櫬寄天涯白簡曾連拜滄洲每共思撫存憐齒稚
歎逝顧身衰泉壤成終古雲山若在時秋風隣笛發寒
日寢門悲世難愁歸路家貧緩墓期舊賓傷未散夕臨
咽恒遲自此辭張邵何由見戴逵獨聞山吏部流涕訪

孤兒

公與夫人相
次沒於共州

衛象傷李端詩

才子浮生促泉臺此路賒官卑揚執

戟年少賈長沙人去門栖鳥災成酒誤虵唯餘封禪草

留在茂陵家

劉禹錫哭呂衡州時余方謫居詩 一夜霜風凋玉芝

蒼生絕望士林悲
空懷濟世安人畧
不見男婚女嫁時
遺草一函歸太史
旅墳三尺近要離
朔方徒歲行常滿
欲為君刊第二碑

元稹傷呂衡州詩 鵲鷲生難敵
沈檀死更香
兒童喧巷市
羸老哭碑堂
鴈起沙汀暗
雲連海氣黃
祝融峯上月
幾照北人喪

白居易哭皇甫七郎中詩 志業過玄晏詞華似禰衡
多才非福祿薄命是聰明不得人間壽還留身後名涉
江文一首便可敵公卿

賈島哭孟郊詩 身死聲名在多應萬古傳寡妻無子
息破宅帶林泉塚近登山道詩隨過海船故人相弔後
斜日下寒天

張祜哭汴州陸大夫詩 利劍太堅操何妨拔一毛冤
深陸機霧憤積伍員濤直道非無驗明時不錄勞誰當

青史上卒為顯詞褒

許渾傷馮秀才詩

旅墓不可問茫茫西隴頭水雲青草

濕山月白楊愁琴信有時罷劍傷無處留淮南舊烟月
孤棹又逢秋

又傷楊攀處士詩

先生憂道不憂貧白髮終為不仕

身嵇阮沒來無酒客應劉亡後少詩人山前月照荒墳
曉溪上花開舊宅春昨夜回舟更惆悵至今鐘磬滿南
鄰

又傷李秀才詩 曾醉笙歌日正遲醉中相送易相期

菊花滿地人亡後菰葉連天客過時琴倚舊窗塵漠漠
劍埋新塚草離離河陽酒熟平生事更向東流奠一卮
李洞弔膳曹從叔郎中詩 華省支殘俸寒齋辦祭稀
安墳對白閣買石折朱衣蜀客彈琴哭江鷗入宅飛帆
吹佳句遠不獨徧王畿

鄭谷弔禮部常員外序詩 臘雪初晴共舉盃便期攜
手上春臺高情惟怕酒不滿長慟可悲花正開曉奠鶯

啼殘漏在風帟燕覓舊巢來杜陵荒草年年綠醉魄吟
魂無復回

陳陶哭王贊府詩 白水流今古青山送死生驅馳三

楚掾倏忽一空名金玉埋皋壤芝蘭哭弟兄龍頭孤後
進鵬翅失前程愁變風雲色悲連鼓角聲落星辭聖代
寒夢閉佳城伊昔來江邑從容副國英德踰棲棘美公
亞飲冰清大厦亡孤直羣儒憶老成白駒悲里巷梁木
慟簪纓隴遂添新草珠還滿舊簾蒼蒼難可問原上晚

烟橫

崔珣哭李商隱詩 成紀星郎字義山適歸高壤抱長

歎詞林枝葉三春盡學海波瀾一夜乾風雨已吹燈燭
滅姓名長在齒牙寒只應物外攀琪樹便著蜺裳上絳
壇

周朴哭陳庾詩 繫馬向山立一杯聊奠君野煙孤客
路寒草故人墳琴韻歸流水詩情寄白雲日斜休哭後
松韻不堪聞

又哭李端詩 三年剪拂感知音哭向青山永夜心竹

在曉烟孤鳳去劒荒秋水一龍沈新墳日落松聲小舊
宅春殘草色深不及此時親執紼石門遙想淚沾襟

元姚燧丞相塔喇哈追封淇陽王制 改為改作緇衣何

賴乎武桓拜後拜前未烏未慚于周魯方歌功于清廟
倏委魄于玄閭豈意少者沒而老者存益信神難明而
理難測憐乃公獨傷于漠北誓爾後均胙乎淇陽嗚呼何
但上下床盡餘子可束之高閣如失左右手慨正人不

作于下泉

梁簡文帝與湘東王令 威明昨宵奄復殂化甚可痛

傷其風韻道上神丰標映千里絕迹百尺無枝文辯縱
橫才學優贍跌宕之情彌遠濠梁之氣特多斯實俊民
也一爾過隙永歸長夜金刀掩芒長淮絕涸去歲冬中
已傷劉子今茲寒孟復悼王生俱往之傷信非虛說

劉孝儀從弟喪上東宮啟 自碣宮陪宴釣臺從幸攀
附鱗翼三十餘載茫昧與善一旦長辭劒匿光芒璧碎

符采躬搖神筆親動妙思雖每想南皮書憶阮瑀行經
北館歌悼子侯不足擬比深仁齊茲舊愛

梁簡文帝南康簡王薨上東宮啟 常願陪承甲館同

奉畫堂預得西苑賦文北場旋食豈謂不幸獨隔昭世
異林有悲飛鳴斯切伏惟殿下愛睦恩深常棣天篤北
海云亡騎傳餘藁東平告盡驛問留書嗚呼此恨復在
茲日

梁元帝荅晉安王書 志異雙鸞之集遽切四鳥之悲

松茂栢悅夙昔歡抃芝焚蕙歎今用嗚咽

劉峻重答劉治書

劉侯既重有斯難值余有天倫之

感竟未之致也尋而此君長逝化為異物緒言餘論蘊而莫傳或有自其家得而示余者余悲其音徽未沫而其人已亡青簡尚新宿草將列泫然不知涕之無從也
隙駟不留尺波奄逝而秋菊春蘭英華靡絕故存其梗槩更酬其旨若使墨翟之言無爽宣室之談有徵冀東平之樹望咸陽而西靡蓋山之泉聞絃歌而赴節但懸

劍空隴有恨如何

任昉王文憲集序 皇朝軫慟儲鉉傷情有識銜悲行路

掩泣豈直春者不相工女寢機而已哉故痛深衣冠悲
纏教義豈非功深砥礪道邁舟航沒世遺愛古之益友
周庾信擬連珠 蓋聞營魄不反燐火宵飛時遭獵夜之
兵或斃空亭之鬼是以射聲營之風雨時有冤魂廣莫
郡之陰寒偏多夜哭

庾信思舊銘序 至于東首告辭西陵長往山陽車馬

望別郊門潁川賓客遙悲私路嵇叔夜之山亭尚多楊
柳王子猷之舊徑唯餘竹林王孫墓地方為長樂之宮
烈士埋魂即是將軍之墓昔嘗歡宴風月留連追憶平
生宛然心目 麟亡星落月死珠傷瓶罄罍恥芝焚蕙
歎 所望鐘沈德水聲出風雲劍沒豐城氣連牛斗
孀機菱緯獨鳳一作鶴孤鸞閨深夜靜風高月寒生平已
矣懷舊何期匣中絃絕隣人笛悲

庾信周故大將軍趙公墓銘 言尋聽訟猶見寒棠還

顧空營唯餘衰柳

唐李商隱為李郎中祭舅竇端州文 銅梁改秩錦里經

時人去而琴臺壞棟文移而石室摧基劉弘之重銘葛
廟王商之更立嚴祠 詎言渭水之乖離竟絕西州之
出入

人部 烈女

晉書烈女傳論 夫三才分位室家之道克隆二族交
歡貞烈之風斯著振高情而獨秀魯冊于是飛華挺峻

節而孤標周篇于焉騰茂徽烈兼邵柔順無愆膺代相
望諒非一緒然則虞興鳩汭夏盛塗山有娥有嬖廣隆
殷之業大姒大姒衍昌姬之化馬鄧恭險險作漢朝推
德宣昭懿淑魏代揚芬斯皆禮極中閨義殊月室者矣
至若恭姜誓節孟母求仁華率傳而經齊樊授規而霸
楚譏文伯于奉劍讓子發于分菽少君之從約禮孟光
之符隱志既昭婦則且擅母儀

宋謝莊孝武宣貴妃誄 玄丘烟煴瑤臺降芬高唐渌

雨巫山鬱雲誕發蘭儀光啟玉度望月方娥瞻星比婺
毓德素里棲景宸軒處麗締綌出愁蘋繁修詩貴道稱
圖照言翼訓似幄贊軌堯門綢繆史館容與經開陳風
緝藻臨彖分微游藝彈數撫律窮幾躊躇冬愛怡悵秋
暉展如之華實邦之媛

唐張說延州豆盧使君萬泉縣主薛氏神道碑 貞孝義
烈之傳吉凶賓祭之儀一聞成誦紘縱糾組之制清笔
醞羞之品一見懸解全乃鶴迴清泛蠶聚崩雲月韻玫

砧花穠綵樹婦人能事咸臻妙焉 蘭行彰信于閨門

蕙風滿盈于邦國

又裴太尉母夫人神道碑 有任姒之德班左氏之才

聖后臨朝召入宮闕拜為御正中宗踐祚歸養私門歲

時致禮媯皇

集作后

補天進參十亂少康嗣夏退叶三從

晉朝公卿列拜虞潭之母周官音注近同韋逞之家

周庾信譙國公夫人步陸孤氏墓誌銘 七德含章四

星連曜敬愛天情言容禮典九日登高作銘秋菊三元

告始或誦春秋年十有四聘于譙國友其琴瑟愈恭節
儉之心伐其條枚實秉憂勤之德鄴地登高之錦自濯
江波平陽採桑之津躬勞蠶月 星機北轉日轡西迴
陽泉伏氣陰律沈灰鶴辭吳市鳳去秦臺神光離合燈
影徘徊雙流反壑百兩迴旌少女離位夫人去城帷堂
野設帳殿郊營山川奇事風月無情搖落丘隴荒涼封
域樹樹秋聲山山寒色草短逾平松長轉直節墳方固
園陵永植

又周趙國公夫人紇豆陵氏墓誌銘 河西丰絕觀津

孤起章武賢臣安豐貴仕木樓千仞金山萬里紹慶邢

娘基昌宋子施衿趙北待姆秦南絃綖禮數褊狄駢驂

義超江汜仁流葛覃玉筐迎燕金籠助蠶敬愛純深端

莊淑問有光國史無形喜愠舉案外恭停機下訓馨馥

于蘭年華于薜風雨消散神靈離絕婺女還星姮娥歸

月左楹夕奠高堂朝發空揚凌波更無迴雪下平曰隰

高平曰原西臨火井北望塞門猶垂雉服尚駕魚軒平

原忽矣天道何言山迴地市路沒滕城松悲鶴去草亂
螢生新雲別起舊月孤明賢墳永式節隴常貞

又周安昌公夫人鄭氏墓誌銘 三星在戶百兩言歸

虔恭內政榮曜中闡承姑奉盟訓子停機桑園蠶績錦
室鸞飛珎璜節步藻火文衣巴水幽咽猿鳴斷絕月落
珠傷春枯桂折趙瑟長辭秦簫永別貞姬掩隧節女封
墳洛濱無月荆臺失雲鳥悲傷聽松聲愴聞千年遂古
百代餘芬

又周冠軍公夫人烏石蘭氏墓誌銘 人世風煙山川

超忽陵陂青麥儻逢貞女之墳隴首白楊或表賢姬之

墓 三星麗天五岳鎮地禮有其秩人居其位燕趙多

奇山川雄氣挺茲令淑惟此含章玉生庭照蘭開室香

邢姨裝服宋子河魴百兩言歸九儀從聘褕狄七彩軒

車六命鼎室辭親槐庭贊政世為閬水人成大夢迴帳

山門移燈泉洞金棗長含銀蠶永送香填栢擲路閉松

城悲鸞獨影雄劍孤鳴留連趙瑟悽愴秦笙

又周大傅鄭國公夫人鄭氏墓誌銘 夫有安世之貴
躬服浣濯子有大伯之尊無忘機杼

又儀同松滋公拓跋兢夫人尉遲氏墓誌銘 昔西河
女子值九節之菖蒲東海婦人得三山之芝草無由再
遇悲矣如何

又冠軍伯柴烈李夫人墓誌銘 妻者齊也謂嫁曰歸
三星夜照百兩朝飛禴狄有典容禮無違台庭等扶侯
服同衣子奉母儀夫聞家政七族承和九閨連慶紛悅

恭肅溫清孝敬杼秉秋成蠶隨春今年華未落電影先
過徒飡日氣空飲天河星凋玉井月拚金波虞淵落日
薤露哀歌寂寞虛奠荒涼象設幽隴龜封重泉蟻結秋
色悽愴松聲斷絕百年何幾歸于此別

入彭城公夫人爾朱氏墓誌銘 玉臺貞氣金河仙波

蔡中郎之女子早聽色絲謝太傅之閨門先揚麗則

巫山南眺逢暮雨於瑤姬華嶽西臨降明星於玉女動
合詩禮言成軌則晨昏展敬事極於移天蘋藻挈誠義

申於中饋女郎砧石響明月而思秋風織婦機牀聽寒
蛩而催絡緯用曹大家之明訓執宋伯姬之貞節加以
心依八覺理會三空遊智刃於檀林泛仙舟于法海機
神獨照嘿言象而無施空有兼忘束筌蹄而不用銀
臺竊藥想奔月而何年玉釜煎香思返魂而無日

唐張說司屬主簿博陵崔訥妻劉氏墓誌銘 璇室載蘭

蕙林層秀喈喈黃鳥豔豔清月明詩說禮竊比諸生茂
行淵心實稱士女及鳳飛啟繇夫婦盡琴瑟之和鷄鳴

咸纏舅姑移喬梓之敬友愛洽乎妯娌任恤周乎姻戚
宣惟禮備澄幕工深機杼固以能循法度宜其室家矣
又上邽縣君李氏墓誌銘 帷堂而哭有敬姜之禮擇
鄰而處有孟母之教入閭俟信有諸婦之期出言成章
有衆女之誠 鏡下窈臺衣絨泉筍壠煙不散松風長
起

又鄧國夫人墓誌銘 家芳淑女國茂賢妃具瞻四德
旁通八徽步幃馳辨連環定機調絃魚躍弄杼鴛飛

陳子昂袁州參軍李府君妻張氏墓誌銘 青松擁抑

哀斷女蘿之心丹節孤高終守栢舟之誓而府君食先
人之德無厚生之財夫人徇黔婁之貞闕丹臺之產孀
居永日蓬首終年處貧素而彌堅保幽芳而不昧 令
儀有穆惠問無誼敦雅志于詩書婉婉情於琴瑟若乃
母師酒食之儀女工纂組之繁莫不總制清衷弘宣懿
則茂蘋蘩之雅韻協沼沚之芳猷雖古稱敬姜詩云淑
女論容比德殆無以過

王維工部楊尚書夫人王氏墓誌銘 事姑至孝旁穆


六姻為母深慈均養七子

又汧陽郡太守王公夫人成氏墓誌 世有明訓家無

遺德蕙心紈質豈曰師成螭首蛾眉抑惟天與同雲降
雪常聞柳絮之詩獻歲發春即賦椒花之頌言事舅姑

宜其家室寢門纔開笄六珈而問安擊鐘未晡具八簋
而獻饋染朱與綠不愆公子之衣采藻及蘋有甚季姜
之祭魚軒翟弗為諸侯之夫人鳴珮垂環對具國之君

子綺跡寓目助選賢人青帳藩身用酬高論誠良人之
從田不啻原獸訓愛子之為政遂返池魚言成大家之
書行為衆婦之法至於彈琴製賦纂組攻書具舉百事
之能仍居四德之外



古儷府卷五